


AKONG NADUNGOG

APAN KARON AKONG NAKITA

 Makalingkod na mo. Pagkamaayo ang mahianhi pag-usab karong gabhiona. Mapasalamaton ako kaayo nga aduna kita karon niining kahigayonan pag-usab nga makaalagad sa Ginoo. Ug human nga napalangan kaayo mo kagabii, nabati ko nga dili maangayon nga langanon pag-usab kamo karong gabhiona.

² Didto sa likod naminaw ako bag-ohay lang ngadto sa usa ka igsoong lalaki nga kaabag nato, diha sa Ginoo, nga bag-o lang miabot gikan sa Indiana, nga nabalaka sa usa ka taglagsaong damgo. Wala pa gayud siya nakaanhi sukad sa Shreveport, sa tibuok niyang kinabuhi. Apan midamgo siya, sa miaging gabii, nga mianhi siya sa Shreveport, nga dili sa kaugalingon niyang sakyanan. Ug mianhi siya sa usa ka . . . o miabot kung asa man, ngadto sa usa ka simbahan kon diin nagawali ako niadto. Miingon siya, human nga miwali ako ug nagpangampo alang sa mga tawo, miingon, “Adunay butang nga mahitabo.” Miingon, nga siya “mibalik pagkasunod nga adlaw.” Ug ingon niya, nga siya “nakaila sa maong bilding, kung unsa ang hitsura niini.” Miingon, “Adunay usa—adunay usa ka awditoryum pangsiyudad sa tabuk sa dalan, apan wala gayud sila nakasulod sa maong awditoryum.” Miingon, “Anaa kadto niining dapita, sa usa ka sementadong bilding nga kini adunay sibay, ug ingon—ani ang pagkapwesto sa mao nga bilding.” Ug ang—ang maong lalaki usa ka magdadamgo, nakita ko na ang iyang mga damgo ug nahibalo ako nga matuod ang mga niini.

³ Ug miingon siya—ug miingon siya, “Dayon sa maong katapusang gabii” nga ako “niadto nagawali ug nagapangampo alang sa mga masakiton.” Ug nag-ingon ako, “Aduna na’y mahitabo.’ Ug adunay mitingog nga sama sa usa ka paglagapak sa dalogdog.” Ug miingon, “Misugod sa pagsiniyagit ang mga tawo.” Ug miingon, “Sa diha nga hinayhinay nang pawala ang dalogdog, bueno.” miingon, “Mitingog Kini, ug misugod pagsulti.” Ingon pa, “Sa nagapadayon Kadto sa pagsulti, nga agi niining mga rihasrihas (sa mga bintana dinhi) miabot ang Himaya sa Dios, nga nagasulod, diha sa porma sa Haligi nga Kalayo.” Wala pa gayud siya nakakita Niini. Nadungog na niya kaming nanghisgot bahin Niini, apan wala pa siya mismo nakakita Niini. Ug miingon, “Atua Kini didto, nga milusot sa mga bintana didto nga sama niana, ug nagpormang Kahayag sama niadtong inyong nakita sa litrato, sa ibabaw mismo sa mga magtatambong dinhi.” Ug miingon, “May butang nga

ginadahunog Kadto.” Ug ingon, nga ako kuno “mitindog, ug miingon, ‘mao Kana si Jehovah nga Dios.’”

⁴ Ug miingon nga siya “napahinumduman bahin sa (sa dihang nahunahuna niya ang bahin Niini) sa dihang gitawag ni Moises ang . . . gipagawas ang katawhan sa Egipto. Ug nga nanag-ingon sila, ‘Tugoting si Moises na ang magsulti, ug dili ang Dios, aron dili kami mamatay.’”

⁵ Miingon siya, “Nanggihapa na ang tanan sa salog, nga nakataas ang ilang mga kamot, nga nanggisiyagit.” Miingon nga siya “nagasiyagit niadto, usab, ‘Ginoong Dios, gihigugma ko Ikaw! Gihigugma ko Ikaw!’” Ug giuyog siya sa iyang asawa ug gipukaw siya.

⁶ Makita ko siya nga nagalakaw sa pasilyo mismo karon, si Igsoong Jackson, usa siya niadto ka Methodist nga magwawali. Ug dili gayud siya mahimutang niadto, hangtud nga mianhi siya; ug ingon pa nga sa pagsulod niya, siya’y “nahibulong kaayo,” sa ingon ka eksakto gayud nga nakita niya kini diha sa damgo. Wala ako kahibalo kung unsay kahulogan niini. Gitago kini sa Dios kanako. Apan adunay butang nga mahimong mahitabo, nga makita nga gidamgo kana ni Igsoong Jackson, nga maila ko nga usa siya ka tawong matinud-anon, tinuod—tinuod nga tawong, alagad sa Dios.

⁷ Ug ako—ako siyang naila nga nagadamgo og mga damgo, nga nagaanhi kanako, ug ihatag sa Ginoo ang hubad, sa ingon gayud kini ka hingpit nga sama niana. Bisan pa, usa niadto ka higayon, sa akong pag-adto sa Arizona, nagkaaduna siya og damgo bahin niini.

⁸ Ug dili gayud siya mahimutang. Kauban niya ang iyang asawa, iyang giuban siya. Hapit na gayud manganak niadto ang iyang asawa, ug ang paagi lamang nga makaanhi siya maoy pinaagi sa eroplano. Wala siya’y kwarta aron nga makaanhi, ug adunay mihatag kaniya og kwarta. Ug mao nga daw sa misteryoso kini nga pagkahitabo, busa adunay butang nga mahimong mahitabo; ginapaabot nato kana. Wala kita nasayod kung unsa gayud ang igatagana sa Dios alang kanato.

⁹ Karon, mapasalamaton kita ngadto sa Ginoo nga nagakinabuhi sa maong adlaw nga atong ginapuy-an, sa wala pa ang pag-abot ni Jesus. Sa gikaingon ko na sa una, kini na ang maong pinaka-bililhon nga panahon sa tibuok kasaysayan. Mas gustohon ko pang mabuhi sa karon kay sa unsa pa mang panahon, sa . . . sa yuta.

¹⁰ Makita ko dinhi sa atong atubangan, pag-usab karong gabhiona, ang akong maayong higala, si Igsoong Lalaki nga Dauch. Nahisgotan ko siya sa auditoryum kaganinang buntag. Nobenta’y tres anyos na si Igsoong Dauch karong adlaw, pagkabulahan gayud. Ginahatag niya ang taas niyang kinabuhi ngadto sa kahimayaan ug pagdalayeg sa Dios, nga nobenta’y

tres na karong adlaw. “Maayong pagsaulog sa Adlaw’ng Natawhan” sa imo, igsoon ko! Ug nasayod gayud ako nga, didto, sa tanang kalungsuran kon diin sila nagapaminaw karong gabhiona, sila usab nagapanimbaya kang Igsoong Bill Dauch og usa ka “Maayong pagsaulog sa imong Adlaw’ng Natawhan.” Usa siya ka suod kaayong higala ni Oral Roberts, daghan pa, daghan siyang natabangan sa dalan sa Ebanghelyo, ug tanan na. Usa siya ka bililhong higala nato.

¹¹ Malipayon akong makita dinhi si Igsoong Mann, ang usa pa ka Methodist nga magwawali, nga naluwas ug nabautismohan sa Espiritu Santo, ug sa Ngalan ni Jesus Cristo, nga nagalingkod dinhi. Siya, usab, usa sa atong mga kaabag gikan sa Indiana. Ug nasabtan ko nga nagalingkod tapad niya si Igsoong Hickerson, usa sa atong mga diyakono sa Jeffersonville, Indiana (nagapaminaw sila didto karong gabhiona). Ug nasabtan ko nga si Igsoong Wheeler, nga usa sa atong mga diyakono ania usab kon asa man. Ug akong—dili ko lang siya makita pa, kung aduna lang motudlo ug makita ko siya dayon; naglingkod dinha, didto dapit sa tuo, oo.

Igsoong Banks Woods, kung nagapaminaw ka man karong gabhiona, ang imong igsoong lalaki ania dinhi kagabii. Nakita ko siya sa akong paggawas, si Igsoong Lyle. Jehovah Witness; nakabig ang maong tibuok banay. Nakabig si Igsoong Lyle tungod sa usa ka panan-awon gikan sa Ginoo.

¹² Niadtong adlaw naglingkod didto sa baroto si Lyle, nga sa maong adlaw nga wala pa kadto nasulti na sa iya nga “adunay butang” nga “magakahitabo mahitungod sa usa ka pagkabanhaw ngadto sa kinabuhi.” Usa siya ka tinuod nga Jehovah Witness, usab! Apan niadtong buntaga, nga didto nagalingkod, sa pagpamingwit, ug nakabingwit siya og... Bueno, aduna siya niadto og usa ka dakung, pagkadakung (kadtoong uso nga pang-Kentucky, kabalo na mo)...usa ka dakung taga ug adunay usa ka gamay, gamay kaayong isda nga mitulon niini. Ug basta na lang niya gibira pagawas ang mga hasang, mga tinai ug tanan na, nga gilabay kini dayon didto sa tubig (ang makaluluoy, nga gamay’ng sunfish), ug miingon siya, “Bueno, gamay’ng isda, naikapay mo na ang katapusan mong pagkapay.” Ang makaluluoy... nga naglutaw-lutaw na sa tubig, namatay, nga ginapalid kini sa hangin ngadto sa pipila ka mga lirio sa lim-aw.

¹³ Ug usa ka adlaw sa wala pa kadto, nga naglingkod, nag-ingon na ako, “Ginasulti kanako sa Balaang Espiritu nga ‘magkaadunay usa ka pagkabanhaw sa kung unsang gamay’ng linalang.’ Magkaaduna siguro og usa—usa ka iring, pagnakapauli na ko, tungod gayud nga...”

¹⁴ Sa dihang nangyokoy kami og pipila ka mga pangpaon sa isda, si Igsoong Woods ug ako, kinsa nagapaminaw niining

gabhiona, ang gamay kong anak nga usa na ka dalaga nga naglingkod dinhi, nga minyoonon ngadto niining lagsaw'ng sundalo. Samtang sila'y . . . Miduol siya, ingon niya, "Daddy . . ." Siya ug ang usa pa ka dalaga, miingon, "Kami . . ." Karon, ang si kinsa man mahimong magkaaduna og unsa man nga matang sa binuhing mananap nga gusto nila, apan sa tinuod lang dili ko gusto ang iring, busa siya . . . o wala'y Branham. Busa kami . . . miingon siya, "Oh, aduna kami nakita og usa ka makaluluoy nga iring sa gawas dinhi, Daddy. Kini—kini—may nakaon kini nga kung unsang butang ug kini'y . . . adunay naghilo niini, miburot na gayud kini." Miingon pa, "Daddy, hapit na gayud kini mamatay, mahimo ba kaming mokuha'g kahon ug atimanon kini sa pipila ka adlaw?"

¹⁵ Ingon ko, "Patan-awa ko sa iring." Bueno, miadto sila ug gikuha ang maong iring. Nakita ko na kung unsay mahitabo, busa gihatagan ko siya og kahon. Ug pagkabuntag, mga pito o walo na ka mga gagmay'ng iring ang atua didto, kabalo na mo. Mao nga ang gamay kong anak nga lalaki, si Joe, gipudyot ang usa sa mga niini, ug gikumot kini ug gibundak kini sa yuta; ug gayu'y—gayu'y . . . atua didto ang gamay'ng iring nga nagkisikisi sa paglamba-lamba, napatay kini.

¹⁶ Ug miingon ako kang Igsoong Lyle, nga iyang igsoon, ingon ko, "Kabalo ka, mahitabo kini tingali nga adunay mabanhaw nga gamay'ng iring, sama sa ato nang nakitang mga butang nga ginabuhat sa Ginoo."

¹⁷ Si Igsoong Lyle, nga bag-o pa lang sa dalanon. Bag-o pa lang siya gisultihan niadto sa Balaang Espiritu nga siya minyo na, ug kung unsa ang iyang nabuhat, ug sa mga nahimo niyang mga kadautan, sa mga butang nga nabuhat niya. Bueno, nagdahum siya nga ginasultihan ako ni Igsoong Banks sa niining mga butanga. Apan sa diha nga gibisto gayud siya mismo Niini, ug gisultihan siya kung unsay iyang gibuhat sa gabii bag-o pa niadto, kadto'y—bug-at na gayud kadto kaniya. Dili niya kini masabtan.

¹⁸ Dayon, pagkasunod buntag . . . Samtang kami namingwit tibuok gabii, sa gagmay'ng mga isda, namingwit kami og pipila aron pangpaon. Apan iya lang gilabay sa tubig kadtong isdaa, nga mikirig, milutaw-lutaw. Mga tunga sa oras human niadto nanglingkod kami didto, ug ako'y . . . Miingon ko, "Igsoong Lyle, gipasagdan mong matulon sa maong isda ang taga paingon sa tiyan mismo niini. Kita mo?" Ingon ko, "Dalha ang pamasol nga tansi dinhi, tuyoka kini, ang paon nga sama niana; dihadhiha nga pagkubit niya niini," ingon ko "dayon kupti na siya ug biraha siya pagkahuman." Ingon ko, "Siya'y . . . ayaw siya biraha nga sama niana, ayaw ipatulon, sa pagbingwit mo sa isda."

¹⁹ Ingon niya, "Aba . . ." Aduna siya'y daku, pagkadakung tansi nga nakalaylay, miingon, "Ingon-aning paagi namo ginabuhat kini," sama niana.

²⁰ Busa, mga ingon nianang panahona, aduna ko'y nadungog nga Usa ka Butang nga nagagikan sa itaas sa bukid didto, usa ka alimpulos, nga nagasige tuyok-tuyok. Ania nagapanaug Kini nga sama niana, ug miabot ang Espiritu sa Dios didto sa maong baroto, miingon, "Pagtindog." Miingon, "Pagsulti nganha nianang patay na nga isda. Ingna, 'Ginabalik ko kanimo ang imong kinabuhi.'"

²¹ Ug ang kadtong isda nga patay na didto sa mga tunga na sa oras, nga ang iyang mga tinai anaa na sa baba niini, ug ang mga hasang pa niini. Ingon ko, "Gamay'ng isda, ginabalik kanimo ni Jesus Cristo ang imong kinabuhi. Mabuhi ka, sa Ngalan ni Jesus Cristo." Mikisi siya balik, ug pailalum sa tubig kini milangoy sa ingon ka kusog nga mahimo niini.

²² Igsoong Lyle, ania ka ba kon asa man? Ako—nakita ta ka kagabii. Kung ania man siya sa sulod, sa gawas man, o kon asa man siya, ipataas ang imong kamot kung makita ko man ikaw. [Adunay nagaingon gikan sa kongregasyon, "Sa balkonahe"—Ed.] Unsay giingon? Anaa sa bal- . . . Oh, oo, didto sa balkonahe, tapad sa mga bintana sa likuran dinha. Kana ang maong lalaki, usa ka Jehovah Witness.

²³ Ingon niya, "Igsoong Branham!" Nadasig gayud siya, ingon niya, "Uh, kini—maayo nga nakaanhi ako dinhi. Dili ba?" Miingon siya, "Uh-uh, ikaw ba'y—ikaw ba'y . . . Uh, sa pagtoo mo kaha napahinugod kana kanako, nga—nga—nga, nga giingnan ko kadtong luoy'ng isda, sa pag-ingon, 'Naikapay mo na ang katapusan mong pagkapay?'" Miingon, "Kadto—kadto—aduna ba'y kahilambigitan kadto alang kanako?"

²⁴ Miingon ko, "Dili, dili, usa lang ka pagpanghimatuod." Nabalaka gayud kaayo siya bahin niadto.

²⁵ Bueno, magkauban kaming nagabiyahe ug makita mong nagakahitabo kadto nga mga butang, nga mahibaloan . . . Karon, hunahunaa lang, kung unsay ginapakita niadto? Aduna ko'y daghan nga mga batang patolon sa akong listahan nga igaampo, sa pagpangampo alang niini, apan sa miabot na ang pananawon alang kadto sa usa ka makaluluoy'ng isda nga mga ingon niana ka taas, mga duha ka pulgada ang gitaa-on o tulo. Mora og ingon ka daku sa isda ang maong taga. Apan kung unsa man kadto, maoy pagpakita kaninyo nga nagatan-aw usab ang Dios sa gagmay'ng mga butang. Kita n'yo?

²⁶ Usa ka adlaw sa diha nga ang mga sanlahon mingkuyanap sa tibuok nasud, gigamit Niya ang Iyang gahum ug gitunglo ang usa ka kahoy. Misugod kadto pagkalaya, sa diha nga nanghigda na ang mga tawo bisan asa nga nanginahanglan niadtong gahum sa pagpang-ayo. Apan, nakita n'yo, gusto Niyang ipakita nga Siya ang Dios sa tanang butang, gamay man kini, o daku man, o bisan unsa pa kini. Siya sa gihapon ang Dios sa tanang butang, sa tanang binuhat. Busa gihigugma nato Siya tungod kay . . .

Kana—nagapahibalo kana kanato, nga kung may kahingawa Siya sa pagsulti sa Pulong sa kinabuhi ngadto sa usa ka gamay'ng dili-hinungdanon nga isda nga patay nang nakalutaw-lutaw didto, sa tubig sa mga tunga na sa oras, piho nga mahimo Niyang isulti sa umalabot nga adlaw ang Kinabuhi ngadto sa Iyang mga anak. Bisan pa ang imong lawas dili na mosubra pa kay sa usa ka kutsara sa abog, magasulti Siya, ug magatubag kita Kaniya sa umaabot nga adlaw. Dios Siya nga may kaikag sa tanang butang, sa tanan nga ginabuhat nato, sa tanan nga ginasulti nato, sa tanan-tanan. May kaikag Siya.

Karon iduko nato ang atong mga ulo, ang tanang dapit.

27 Ginahunahuna ko karon, sa dili pa kita moampo, kung aduna kaha karong gabhiona nga may kaikag diha Kaniya, apan wala ka pa gihapon nakapareserba alang sa pikas bahin nga Yuta kon diin nga kita makigkita Kaniya. Kabalo mo, dili kamo makasulod nga wala nakapareserba. Ug wala pa ninyo kini nahimo, apan gusto ninyo nga mahinumduman karon diha sa pag-ampo, nga mahitul-id ang tanan tali kanimo ug sa Dios karong gabhiona, mahimo bang itaas ninyo ang inyong kamot; ingnon mo, “Hinumdumi ako, Ginoo”? Ikaw... ipakita lang Kaniya ang inyong kamot. Dios, itugot kini.

28 Langitnong Amahan, samtang nga nagatindog kami karong gabhiona tali sa mga buhi ug sa mga patay; ug nga nagakahitabo kining mga butanga niining mga adlaw, misterioso, siguradong misterioso ang mga niini; apan Dios, nasayod Ka kung ang mga niini ba'y matuod o dili, Ikaw ang maong talahurong Maghuhukom sa mga langit ug yuta. Ug among ginasulti kini, Ginoo, nga mapadasig gayud ang mga tawo (sa pipila sa mga butang nga Imong gipakita kanamo), aron nga mapadasig pa sila nga higugmaon Ka ug toohan Ka, alagaran Ka, ug nga mahibalo nga bisan unsa pa ka gamay ang binuhatan, maayo man o dautan, makita Mo kini. Nagaampo ako, minahal nga Dios, nga Imong panalanginan ang matag usa niadtong mga kamot karong gabhiona, ug ang kalag ug espiritu nga miaghat sa pagpataas nianang kamot. Ug nagaampo ako, Dios, nga mamahimong kini na ang gabii nga mapahigayon na ang ilang mga pagpareserba alang nianang Yutaa sa tabok sa maong suba. Itugot kini.

29 Ayoha ang mga masakiton ug ang mga nanag-antus, Ginoo, nga parehong ania dinhi, ug latas sa tibuok nasud kon diin nagaabot ang—ang—ang pagsibya pinaagi sa mga telepono. Panalangini kadtong mga anaa sa gawas nga mga dili pa luwas, maggikan didto sa California ngadto sa New York, gikan sa Canada ngadto sa Mexico. Itugot, Ginoo, nga ang matag tawong ilalum sa tunog sa among tingog, karong gabhiona, mamaluwas gikan sa ilang mga kasal-anan, mamaayo sa ilang sakit, tungod sa Balaanon Nimong Presensiya.

30 Ug ang kining among Igsoong Jackson, nga nag-eroplano pa sa linibong mga milya sa pag-anhi dinhi, aron nga

makaanhi tungod sa usa ka butang nga nagpahingawa sa iyang kasingkasing; “Ug managdamgo sila og mga damgo, ug makakita’g mga panan-awon.” Minahal nga Dios, padayon Mong gitago kini kanako, kung unsay kahulogan niini; wala ako nahibalo. Apan kung Imo kaming duawon, Ginoo, andama ang among mga kasingkasing karon alang nianang pagduaw. Aron nga mapailalum kami sa maong mga pagpaabot, nga wala nahibalo kung unsay Imong pagabuhaton, ug nga wala nahibalo kung nagsaad Ka sa pagduaw kanamo pinaagi niining damgo; wala kami nahibalo. Apan among—amo lang ginakutlo ang kadtong maong mga butang nga among masabtan, nga nagsaad Ka nga duawon Mo ang Imong katawhan, ug nagaampo kami nga himoon Mo nga matuod ang Imong Kaugalingon kanamo dinhi. Sa Ngalan ni Jesus Cristo amo kining ginapangamuyo. Amen.

³¹ Karon, niining gabhiona, human nga napalangan kamo kaayo kagabii ug kaganinang buntag, ug medyo na nga nagakapagaw ako’g diyutay. Aduna ako’y gamay’ng peluka nga napalit ko, nga akong ginasul-ob tabon sa akong upaw na nga bahin *dinhi* sa diha nga nagawali ako. Apan nalimtan ko kini niining higayona, ug kining mga hangin, nga nagahuyop lahus niining mga bintana, maoy nagsugod nga hatagan ako og usa—usa ka diyutay’ng pagkapagaw. Ako sa una . . . Gikinahanglan ko niadtong humanon dayon ang mga panagtigum, apan sukad nga aduna na ako niana, nan dili na nahasol pa niini, nagapadayon lang ako. Ug nalimtan ko kini, ug kini’y . . . Akong . . . medyo sa mabati ko kini, busa pagapasalamatan ko gayud ang inyong mga pag-ampo. Ug karon, duha na kini ka mga panerbisyo matag adlaw, nga ilang . . . nga medyo . . . Kabalo na mo, sa diha nga taastaas na ang nadagan mo, kini . . . maingon mo kini.

³² Busa karon kaninyong mga tawo dinha sa California, ug didto sa Arizona, ginapadangat namo tanan ang among mga pagpangamusta sa tibuok nasud. Kang Igsoong Leo ug sa maong grupo nga nagapaabot sa Ginoo didto sa Prescott, nga ginadapit karon, ug kaninyong tanan nga mga tawo sa tibuok Phoenix, nga usa ka semana gikan karong gabhiona, mangadto kami didto sa Yuma sa maong bangkete. Ila nang napamaligya ang tanan nilang mga tiket didto ug nakakuha na sila og usa ka dakung auditoryum, ug dili nila mapasigo ang mga tawo. Busa pangadto mo og sayo, kamong tanan, aron—aron nga makasulod pa. Dayon mopaingon kami sa Los Angeles gikan didto, pagkasunod Lunes . . . pagkasunod Dominggo, sa Dominggo sa gabii. Ug busa magapaabot kami nga makita kamong tanan didto. Ang kadagaya nga panalangin sa Dios magapabilin kaninyong tanan.

³³ Kaninyong mga anaa sa New York, ug kamong mga anaa sa palibot sa Ohio ug sa mga nagkalain-laing dapit, sa dili madugay gusto kong iwali ang Mensaheng *Ang Inagian Sa Maong*

Serpente (ang mapintas nga mananap didto sa sinugdanan, ug ang mapintas nga mananap sa katapusan), didto sa Tabernakulo. Pagapadalhan kamo ni Billy og usa ka gamay'ng sulat alang niana, sa dihang pagahisgotan na nato kini, kay ginahimo ko kana didto sa Tabernakulo tungod kay mamahimo kining, sa labing menos, mamahimo kining upat ka oras o sobra pa.

³⁴ Busa karon. . . busa gusto ko kamong mga ania dinhi, dinhi ug kung asa man kamo karon, sa pag-abli ngadto sa Basahon ni Job. Talagsaon kaayong Basahon nga pagabasihon sa pagwali, apan gusto ko nga gamiton lang ang pipila ko ka mga sinulat dinhi karon.

³⁵ Ug dayon, ugma sa buntag, dinhi sa tabernakulo, magkaadunay pang-Sunday School nga mga panerbisyo sa. . . Unsa bang oras kita nagasugod dinhi? [Usa ka lalaki ang nagaingon, “Alas nuebe y medya.”—Ed.] Alas nuebe y medya. Ug pagkahuman magkaaduna ako og kahigayonan nga makawali pag-usab dinhi ugma. Ug kung itugot sa Ginoo, gusto kong maghisgot sa hisgotanang. . . kung itugot Niya, karon, ingon nga akong natun-an kaganinang hapon, aron ipakita kaninyo nga, “Adunay usa lang ka dapit kon diin makigtabo ang Dios sa usa ka magsisimba.” Uh-huh, ang bugtong. . . Ug—ug nga masulti kaninyo kung unsa kana nga dapit, ug kung unsa ang Ngalan nianang dapita, kon diin nga pagatagbuon sa Dios ang magsisimba.

³⁶ Ug dayon, ugma sa gabii, gusto kong mohangyo og usa ka pabor, kana maoy, alang sa usa ka panerbisyo sa pagpang-ayo. Ug akong—gusto ko ang usa ka kinarang panerbisyo sa pagpang-ayo. Ug kung itugot sa Ginoo, gusto kong hisgotan ang usa ka hisgotanan nga nakapaalarma kanako sa karon. . . Sa dihang ako ug si Igsoong Moore nagapakig-estorya, minahal kong mga kaigsoonan, gihisgotan namo ang bahin sa mga Kasulatan. Ug daw sa unsa ka maanindot ang mahiuban kanilang mga igsoon, sama kanhing mga adlaw. Ug miingon siya, “Kabalo ka, Igsoong Branham, sa tanang mga pagwali nga nahimo mo alang kanamo dinhi sa Shreveport, *Ang Karnero Ug Ang Salampati* maoy usa sa mga pinakamahinungdanon sa mga mensahe nga imong nahatud gayud kanamo dinhi sa Shreveport.” Miingon, “Siguro tungod sa imong Mensahe nga nagpakapoy gayud kanimo karong adlaw, dili mo na gayud mahimo ang usa sama niadto.”

³⁷ “Pagnasipyat ako Niana, nasipyat ako sa akong Mensahe.” Gugma maoy ang akong. . .

Gihigugma kong naghimalatyong Cordero, ang
 Imong bililhong Dugo
 Dili gayud kini mawad-an og gahum,
 Hangtud nga ang tanang tinubos nga iglesia sa
 Dios
 Maluwas, aron nga dili na magpakasala pa.

Sukad-sukad nga pinaagi sa pagtoo, nakita ko
 kadtong agas
 Nga sa Imong nagabuhagay nga samad
 nagagikan,
 Gugmang nagatubos mao na'y akong tema,
 Ug mamaingon niana hangtud nga ako
 mamatay.

³⁸ Ugma sa gabii, kung kabubut-on kini sa Ginoo, gusto kong mowali sa usa ka hilisgutang: *Diha Sa Mga Pako Sa Usa Ka Niyebe-Ka-Puti Nga Salampati*. Ugma sa gabii, “Ang Ginoo nga nagapanaug diha sa mga pako sa usa ka Salampati,” kana, kung itugot sa Ginoo, nga dili mograbe sa pagkapagaw ang akong tingog. Karon. . . busa, iampo kami.

³⁹ Ug dayon gusto ko ang usa ka kinaraang panagtigum sa pag-ampo sama sa nagkaaduna kita kaniadto sa pagsugod, nga wala’y mga pagpang-ila, hatagan lang og kard ang tanan kadtong gustong maiampo. Karon, kinahanglan aduna kamo’y kard, busa pag-anhi og sayo aron nga mahatagan kamo og kard ni Billy ug mapadayon kini nga nakalinya. Kung dili mo buhaton kana, padayon na lang nga magbalik-balik ang mga tawo, ug nga magbalik-balik, ug nga magbalik-balik, ug wala na’y katapusan ang paglinya. Mahimong magkaaduna og kard ang si kinsa man. Gusto kong motindog tapad kanako si Igsoong Jack diha sa maong linya sa pagpaampo, sama sa ginahimo mo kaniadto, ug si Igsoong Brown aron nga ihatud ang mga tawo kanako imbis nga si Billy Paul. Ako—ako—ako—gusto kong—gusto ko ang usa ka kinaraang linya sa pagpaampo, ug mangampo lang kita sa paagi nga naandan na nato sa mga katuigan nang nangagi.

⁴⁰ Malipayon ako karong gabhiona nga aduna pa’y usa ka igsoong kaabag nga kauban nato, bag-o lang ako milantaw sa palibot ug nga naila dayon ug nakita siya, kaganina lang, si Igsoong Gordon Lindsay. Usa siya sa mga beterano na, kauban nato siya sa dugay nang panahon. Nagatuman sa usa ka dakung buluhaton, ang pagprinta, siya ang nagaprinta sa akong libro karon: *Ang Pito Ka Mga Kapanahonan Sa Iglesia*. Nagalaum kami nga mahiandam na namo pag-usab, *Ang Pito Ka Mga Selyo*. Kung mabasa man niya kana nga dili pa niya kini mapaprinta, magkaaduna kami og usa ka pang-teolohiyang pagpanghisgot. Mabati ko gayud nga mahitabo kini. Apan nasayod siya nga dili ako teologo. Busa. . . Apan nagapaabot kami alang ugmang gabii. Kung ania ka man, Igsoong Lindsay, anhi ka ugma sa gabii. Kung mahimo mo, agi ka dinhi ug ubanan mo kami sa entablado alang sa usa ka kinaraang panagtigum sa pagpangampo.

⁴¹ Pila man ang gustong makakita pag-usab sa usa kanila nga mga beterano na, kon diin atong ginadala ang mga tawo? Mamahimong maayo kana. Karon, dalha ang inyong mga

masakiton ug mga nag-antus, ugma sa gabii, alang nianang katuyoan kung ingon-ana.

⁴² Karon, kung aduna kamo'y Basahon ni Job, sa ika-42 nga bersekulo . . . o sa ika-42 nga kapitulo, ug ang unang unom ka mga bersekulo sa ika-42 nga kapitulo sa Job; talagsaon kaayo. Igsoong Ted Dudley, kung nagapaminaw ka karong gabhiona, dinha sa Phoenix, nahinumduman mo bang nagaestoryahanay kita usa ka higayon niadto, mga usa na ka semana ang milabay o duha, ug napahinungdan nato kini? Miingon ako kanimo, "Moabot ang adlaw nga mamahimong usa ka teksto kana alang kanako." Ug gusto kong gamiton kini karong gabhiona.

Unya mitubag . . .

Unya si Job mitubag sa GINOO, ug miingon,

Paminaw og maayo niining pagbasa karon.

Ako nahibalo nga ang tanang mga butang mahimo nimo, ug walay pagduhaduha nga walay kapugngan nimo.

Kinsa ba kini nga nagatabon sa kaalam sa pagkawalay kahibalo? Busa nakasulti ako niadto nga wala ko hisabti; mga butang nga makapahibulong kaayo kanako, nga wala ko matugkad.

Pamati, ipakilooy ko kanimo, ug ako mosulti: magapangutana ako karon kanimo, ug magapahayag ka kanako.

Nakadungog ako mahitungod kanimo tungod sa pagpamati sa igdulungog: apan karon nakita ko ikaw sa akong mata.

Tungod niini gingil-aran ako sa akong kaugalingon, ug ako maghinulsol sa abug ug abo.

⁴³ Karon gusto kong mokuha og usa ka teksto gikan nianang ika-5 nga bersekulo.

Nakadungog ako mahitungod kanimo tungod sa pagpamati sa igdulungog: apan karon nakita ko ikaw sa akong mata.

Hinaut nga panalanginan sa Ginoo ang Iyang Pulong.

⁴⁴ Si Job, maghisgot kita og gamay mahitungod sa iyang kinabuhi. Si Job usa ka propeta. Usa siya ka tawo nga nagkinabuhi kaniadtong wala pa nasulat ang Biblia. Gitooan sa una pa nga ang Job maoy usa sa mga pinaka-karaan na nga mga Basahon sa Biblia, tungod kay nahisulat Kini sa wala pa nahisulat ang Genesis. Si Job, kining bantugan nga manggugubat ug propeta, maoy usa—usa ka gamhanang tawo sa iyang mga adlaw. Wala'y duhaduha nga napadaku siya ug nag-alagad sa Ginoo sa tibuok niyang kinabuhi. Ug nagkinabuhi nga

ingon ka maisogon nga kinabuhi ngadto sa mga tawo, nga may pagtahud ang tanan kaniya.

⁴⁵ Apan miabot siya sa usa ka punto kon diin ginatawag niya kini dinhi, ingon nga *gisulayan* sa Ginoo. Apan gusto kong mogamit sa pulong, ingon nga “gisulayan” sa Ginoo. Ug tinuod, “Ang matag usa ka anak nga nagaduol sa Dios kinahanglan nga masulayan, sinulayan, binansay ingon nga anak.” Ug dayon kung nagakabug-at ang pagsulay, ug isipon nato nga bug-at na kini kaayo ug dili na maminaw (dili na motuman), kung ingon-ana nag-ingon Siya nga kita “mahimo nga usa ka anak sa gawas, ug dili nga usa ka anak sa Dios.” Tungod kay, wala’y bisan usa man nga makapahilayo sa usa ka tinuod, natawo na pag-usab nga anak sa Dios palayo gikan sa iyang Ginikanan, kita n’yo, siya’y kabahin Niya. Pareho lang nga sa ginasalikway mo kini, ginasalikway mo ang imong kaugalingon. Kita n’yo, anaa na kanimong kasinatian, nabansay ka na ug nasulayan na.

⁴⁶ Ug karon, kining lalaki ingon nga usa ka propeta, aduna siya’y alagian ngadto sa grasya sa Dios, apan wala kaniadto si Job og Biblia nga mabasa. Siya. . . wala pa nahisulat ang Biblia kaniadto, apan aduna siya’y alagian ngadto sa Dios pinaagi og pinadayag ug pinaagi sa panan-awon. Kadto sa wala pa nahisulat ang Biblia.

⁴⁷ Karon, nahibaloan na nato, ug hisgotan pa gamay ang bahin sa iyang kinabuhi, sa dihang gipanalanginan siya sa Dios ug gihimo siyang usa ka bantugan nga tawo. Aba, bisan ang tanan na mitahud kaniya, bisan sa iyang kaalam, nahimong bantugan kaayo. Ang dihog kaniya nga nagagikan sa Dios mao ang nagpanghimatuod kaniya ingon nga alagad sa Dios, sa tataw kaayo, hangtud nga nangabot ang mga tawo gikan sa tanang dapit aron magpatalinghug kaniya. Ug dayon gisugdan nga pasanginlan ni Satanas kadtong tawhana. Ug ingon niana ang iyang ginahimo sa matag dinihogan nga alagad sa Dios, anaa dinha kanunay si Satanas aron pasanginlan siya sa tanan nga ginahimo niyang dili husto.

⁴⁸ Ug, karon, nahibaloan na nato ang iyang kinabuhi ug mga pagsulay, ug ang iyang dakung pagtoo. Bisan si Jesus, sa dihang mianhi Siya sa yuta, gipahinungdan Niya ang pagkamaintuson ni Job. Miingon Siya, “Wala ba ninyo nabasa ang mahitungod sa pagkamaintuson ni Job?” Nagapaabot ang pagtoo kauban ang pagkamaintuson alang sa pagkatuman sa gisaad nga Pulong.

⁴⁹ Karon, mahimatikdan nato dinhi nga si Job, human nga naagian niya ang iyang mga pagsulay, ang tanan niyang mga pag-antus. . . Aduna siya’y usa ka maanindot nga pamilya, gikuha sila gikan kaniya. Aduna siya’y maayong panglawas, gikuha kini kaniya. Ang tanan nga iyang gipang-iya niini nga kinabuhi gipanguha. Ug naglingkod siya sa usa ka tipun-og sa

abo, nga may usa ka tipak sa kulon, nga ginakagis ang iyang mga kabahong. Ug bisan ang kaugalingon niyang asawa, misulti batok kaniya, ingon niya, “Nganong dili mo man tunglohon ang Dios, ug magpakamatay?”

⁵⁰ Miingon siya, “Ikaw nagasulti ingon nga usa ka babayeng buang.” Miingon siya, “Ang Ginoo ang mihatag, ug ang Ginoo ang mikuha, bulahan ang Ngalan sa Ginoo!”

⁵¹ Karon, miadto si Satanas sa atubangan sa Dios, kay makaadto man siya sa atubangan sa Dios, ug ginapasanginlan ang mga Cristohanon (o, ang mga magtotoo) sa tanang panahon. Busa iyang gipasanginlan si Job sa daghang mga butang, ug miingon nga “Si Job, ang hinungdan nga makaalagad siya sa Dios, tungod kay maayo man ang dagan sa tanang butang ngadto kaniya.” Apan miingon, “Kung itugyan Mo lang siya sa ako, sa akong mga kamot, himoon kong magapasipala siya Kanimo sa Imong nawong.”

⁵² Gusto kong mahimatikdan ninyo ang pagsalig nga aduna ang Dios sa usa ka magtotoo. Kita n’yo? Siya’y. . . Sa uban pang pinulongan, giingnan sa Dios si Job. . . o miingon ngadto kang Satanas, ingon niini, “Dili ka makahimo niini! Usa siya ka matarung nga tawo nga gipakamatarung. Usa siya ka maayong tawo. Siya. . . wala’y ni usa nga kapareho kaniya sa tibuok kalibutan.” O daw sa unsa nga tawo; nga ang Dios Mismo ang moingon ngadto sa Iyang kaaway, “Pagkahingpit sa Akong alagad, wala na’y usa pa nga kapareho kaniya sa kalibutan.” Oh! Kung mahimo lang nato nga mamaingon niana nga matang sa tawo! Ang mapahinungdan sa Dios og ingon niana nga pagsalig kanato! Nga nahibalo nga dili kita mosimang gikan sa Iyang Pulong o sa Iyang Persona, sa unsa mang paagi! Eksakto nga magpabilin gayud, ug mahimo Niyang ihatag ang Iyang pagsalig kanato.

⁵³ Karon, usa ka tawo si Job nga bug-os ang pagtuman sa mga kasugoan sa Dios, sa eksakto gayud. Ug nakahibalo si Satanas niana, apan miingon siya, “Kung itugyan Mo lang siya kanako, himoon kong magapasipala siya Kanimo sa Imong nawong.”

⁵⁴ Busa giingnan siya sa Dios, miingon Siya, “Karon, anaa na siya sa imong mga kamot, apan ayaw gayud kuhaa ang iyang kinabuhi.” Ug gani nagpahimulos gayud si Satanas sa ingon ka grabe nga mahimo niya kadto. Iyang gikuha ang matag higala, ug ang tanan na nga anaa kaniya, halos ang tibuok na niyang kinabuhi, apan dili niya mahimong kuhaon ang kinabuhi niini. Apan padayon gihapon nga mingbarug si Job, nga wala’y pagkaatras.

⁵⁵ Nakita n’yo, pagnaka-kontak gayud sa makausa ang usa ka lalaki o usa ka tawo ngadto sa Dios, pinaagi nianang tinuod, naipadayag nga pagtoo nga “Dios gayud!” Wala’y bisan unsa man, walay panahon, walay lugar, ang makapahimulag

nianang tawhana gikan sa iyang Dios. Nagtoo ako nga si Pablo kadto ang nag-ingon, “Walay gubat, walay kagutom, walay mga katalagman, ni buhi man nga mga linalang, o kamatayon, o bisan unsa man ang makapahimulag kanato gikan sa gugma sa Dios nga anaa kang Cristo Jesus.” Luwas kang nakaangkla na diha Kaniya tungod kay gikatagana ka na ngadto nianang Kinabuhi.

⁵⁶ Apan nagdahum si Satanas nga malubag niya siya og diyutay, ug gapuson siya, ug itukmod siyang buhaton kini. Apan, nakita n’yo, si Job tungod sa iyang hingpit nga kapadayagan mahitungod sa Dios, ug kung Kinsa ang Dios, ug kung giunsa siya paghigugma sa Dios, naghulat siya! Bisan unsa pa nga mga kahimtang kadto, naghulat siya nga mapamatud-an ang iyang pagtoo, tungod kay aduna siya’y pagkapyot sa Dios, usa ka kapadayagan. Kana ang gihisgotan ko kagabii.

⁵⁷ Karon, sa diha nga ang mga tawong masakiton nga ania sa bilding, ang mga tawong bakol, o kamo nga adunay panginahanglan sa Dios, pagmaangkon ninyo kana nga matang sa kapadayagan nga kamo’y “gimatarung na,” nga tinuod na gayud kamong gimatarung diha sa paghangyo sa maong butang nga inyong ginahangyo, ug nagatoo nga “Siya mao ang magbabalus sa niadtong mga nagapangita Kaniya,” Walay bisan unsa man ang makapahimulag gayud kanimo gikan nianang pagtoo nga nakaangkla na kanimo. Kita n’yo? Apan, una, kinahanglan nga mahipadayag kini kanimo.

⁵⁸ Adunay miabot dili pa lang dugay, usa ka grupo sa mga tawo, ang uban kanila nagapaminaw karong gabhiona, ug giingnan ako, miingon. . . Padayon kong giingnan sila, “Adto mo sa Kentucky, aduna didto ang petrolyo.” Nasayod ako nga atua kini didto, nakita ko kini sa usa ka panan-awon.

⁵⁹ Bueno, si Igsoong Demos ug sila dugay kaayo nga wala miadto. Human niadto, sa kaulahian, miingon sila. . . Human nga misulod na ang Texas. Ug nanag-ingon sila, “Karon paadto na kami didto.”

⁶⁰ Ingon ko, “Miadto na unta kamo sa una pa.” Apan wala nila gibuhat kadto.

⁶¹ Miingon si Demos, “Dakung kasaypanan ang nahimo ko niana, sa dili pagbuhat niana, Igsoong Branham.”

⁶² Ingon ko, “Kung miadto lang unta kamo didto, inyo na unta kadto tanan.”

⁶³ Bueno, dili sila niadto maminaw niini. Dayon ang unang. . . dayon sa wala pa kami mibiya niadtong gabhiona. . . Sa—sa lugar kon diin kami naniudto. Gipakita kanako sa Balaang Espiritu ang usa ka dakung siak sa yuta, ug sa sulod niana puno sa petrolyo, ug kining mga pag-awas didto sa Kentucky mga ginagmay lang nga mga deposito nga ilang ginabomba, apan kining usa nagagikan mismo sa nagaagas nga tinubdan. Ug ingon ko, “Igsoong Demos, anaa kini didto.”

64 Busa miadto sila aron pangitaon kini. Miingon, “Adtoan nato ug isulti kanamo kung asa ang—kung asa dapit ang maong petrolyo.”

65 Ingon ko, “Oh, dili! Dili! Dili!”

66 Kita n’yo, wala nato gamita ang gasa sa Dios para sa patigayon. Dili! Dili! Mahimo Niyang isulti kanako kung asa kadto dapit, apan wala ako’y unsa man nga pagpanginahanglan niini. Wala gani ko’y igong pagtoo nga hangyoon Siya. Kita n’yo? Kung aduna ako’y panginahanglan niini, nagatoo ako nga kung hangyoon ko Siya, isulti Niya kanako. Apan un, nakita n’yo, ang imong mga tumong ug katuyoan kinahanglan nga husto. Kinahanglan nga aduna ka’y mga hinungdan alang niini. Wala ginahatag sa Dios kanang mga butanga tungod lang kay nagahangyo ka. Ug dili ka mahimong mohangyo diha sa pagtoo gawas kung aduna’y usa ka tinuod nga katuyoan para niana, nga maanaa sa kabubut-on sa Dios. Kita n’yo, kung gusto mong mamaayo, sa unsang hinungdan nga gusto mong mamaayo? Kita n’yo, kung gusto kang ayohon, sa unsay hinungdan nga gusto kang ayohon? Unsa’y imong ginaingon sa Dios? Unsa ma’y gusto mong buhaton sa imong kinabuhi pag-naayo ka na? Kita n’yo, kinahanglan aduna gayu’y . . . kinahanglan aduna ka’y tumong ug katuyoan, ug kinahanglan nga ang mga niini husto sumala sa kabubut-on sa Dios. Ug sa diha nga ang maong pagtoo nahipadayag na kanimo, ug ang Dios pinaagi sa Iyang gamhanang grasya ginapahimutang kana nga pagtoo dinha, kung ingon-ana kini human na. Kita n’yo? Karon kita n’yo?

67 Karon, aron nga pamatud-an kadto nga Pulong, pag-abot na sa mga kaigsoonan didto, nakakuha sila’g. . . usa ka lalaki ang miadto didto ug namalit sa kung unsang butang, ug namaligya og mga kasabutan, ug gitikasan ang usa pa sa niining paagi. Ingon ko, “Nakita n’yo na, dili kini magpulos.” Karon aron lang nga mapamatud-an ang maong *propesiya*, sulod sa mga usa ka gatus ka yarda kon diin nagkalut kining mga lalaki sa ilang bangag, nakalut sa usa ka tawo ang dakung bugwak. Ug atua kini didto, onse ka gatus ka mga drum-drum sa petrolyo sulod sa tunga sa adlaw, o kapin pa o mga ingon niana; nagapaagas kini sa gihapon, sa mismo nianang tinubdan nga nagabugwak. Apan aron lang nga tumanon ang propesiya, ang Pulong nga nag-ingon nga atua kini didto, atua kini didto. Ang tanan nang uban pa niini halos namalhan na, sa tibuok Kentucky. May gamay’ng mga lim-aw, sa pagbomba nila niini sa kadali, nahubsan na. Kadto lang ang awas nga nagagikan *niini*. Kita n’yo?

68 Apan, tungod sa pagkahakog nga nagpatigbabaw niini, sayup na ang mga katuyoan, mopirma sa usa ka pundok nga mga butang nga “kini mamahimong ingon *niini*,” sa dihang nagsaad na sila nga buhaton nila kini alang sa Ginghamian sa Dios, apan mora og para na kini sa ilang mga kaugalingon. Kita n’yo?

⁶⁹ Ug dili kini magpulos, wala'y kahakog nga butang ang magpulos. Ang imong mga tumong ug mga katuyoan gikinahanglan nga eksakto, nga husto gayud, kung ingon-ana aduna ka'y pagtoo, aron mohangyo. "Kung ang atong mga kasingkasing wala nagasudya kanato, nan may pagsalig kita." Kita n'yo? Kita n'yo, gikinahanglan nga aduna kita'y pagsalig. "Gusto ko kini alang sa kadunggan ug himaya sa Dios." Kung ingon-ana ang pagtoo aduna na'y usa—usa ka alagianan aron makasulod; kung dili, nan aduna ka'y pangutok lang, pang-intelektuwal nga pagtoo, ug dili tinuod nga pagtoo nga gikan sa Dios. Wala ka'y mapaingnan nianang intelektuwal nga pagtoo. Mahimong himoon kang emosyonal, apan dili niini mahatag ang kaayohan nga imong ginapangita.

⁷⁰ Busa, si Job, ginasusi niya ang iyang kaugalingon pinaagi sa tinuod nga pagtoo nga gikahatag sa Dios kaniya nga siya'y "matarung," nga nahimo niya ang tanan nga gikinahanglan sa Dios kaniya nga buhaton. Karon sa diha nga kita igaampo na, para sa atong mga balatian, nagahunahuna lang ako kung nahimo na kaha nato ang tanan nga gikinahanglan sa Dios kanato nga buhaton. Nasunod na kaha nato ang matag tipik sa Kasulatan? Gitugyan na kaha nato ang atong mga kasingkasing ug mga kinabuhi ngadto sa pagpangalagad? Unsa ma'y hinungdan nga gusto mong maayo? Kana ang hinungdan nga dili mo maangkon ang igong pagtoo, kita n'yo, tungod kay wala mo pa tingali nahimo kini nga butang ngadto sa Dios sa pagkamatinuuron nga gikan sa imong kasingkasing. Sama sa gibuhat ni Ezechias, gihatag sa Dios ang hinungdan, gusto niya nga mahan-ay ang iyang—ang iyang gingharian. Ug gipadala balik sa Dios ang iyang propeta ug giingnan siya, ug nga mamaayo na siya. Kita n'yo? Apan, gikinahanglan nga mapatulid mo kadtong mga butanga, una.

⁷¹ Busa dayon sa dihadiha nga mahiabot ka niining mga puntoha ug nasayod nga nahipadayag na kini kanimo pinaagi sa Pulong sa Dios, pinaagi og kapadayagan, pinaagi og Pulong nga ginapabuhat sa Dios kanimo aron buhaton, kung ingon-ana anaa na kanimo ang pagtoo, tinuod nga pagtoo.

⁷² Karon, sama lang ni Abraham sa dihang nobenta'y-nuebe na ka tuig ang iyang kagulangan. Nagtoo ko, sa Genesis 17. Nagpakita ang Dios ngadto niining tigulang na nga tawo, karon nga, nobenta'y-nuebe na ka tuig ang kagulangan, sa diha nga halos usa ka gatus na siya ka tuig ang kagulangan, nga nagsige'g hulat alang niadtong saad sa tanan na niadtong mga katuigan. Mipakita Siya kaniya sa ngalang *El Shaddai*, ang "Ang Maong Madughanon." Ug daw sa unsa nga pagdasig kadto, apan sa gihapon wala pa natuman niadtong saad. Apan, "Abraham, Ako mao ang Dios nga Makagagahum sa tanan, *El Shaddai*, 'ang Tighatag og Kusog, ang Madughanong Dios.'"

⁷³ Sama sa giingon ko na kaninyo sa una, sama sa gamay'ng masuso nga nagahigwaos, ug may sakit, ug nga nagahilak, ug mopahimutang kini sa dughan sa iyang inahan. Ug mototoy kini sa pagpabalik sa kusog niini gikan kaniya, tungod kay nagakatagbaw kini samtang kini nagatotoy, tungod kay ang bugtong lang nga paagi nga aduna kini ug nga nasayran mao lang ang soso sa inahan. Walay nahibaloan kini nga takal sa tambal. Mahimo mo siyang hatagan og usa ka takal sa tambal, moyagak siya ug mohilak. Indyeksyunan mo siya sa bukton, ug siya'y motiyabaw. Apan ang bugtong paagi lang nga matagbaw siya mao ang dughan sa maong inahan.

⁷⁴ Ug nag-ingon Siya, "Abraham, tigulang ka na, wala na ang imong kusog, nanglupaypay na ang imong mga bukton, wala na ang kadasig sa imong pagkalalaki, apan Ako ang imong Inahan. Pagkupot lang sa Akong saad, ug magpakatagbaw samtang ikaw nagapaabot. Pagpahulay!"

⁷⁵ Karon, ingon niana ang matag magtotoo, bisan unsa pa ka grabe na ang pagpaantus kanimo sa kanser, bisan unsa pa man ka dugay kang naglingkura diha sa wheelchair, bisan unsa pa nianang mga butanga, kung mahimo mo lang nga makapyutan kana nga pinadayag gikan sa Dios! Nan magpakatagbaw, sa pagkasayod nga mahitabo kini, tungod kay mainantuson nga nagahulat ang pagtoo sa saad. Kita n'yo?

⁷⁶ Nasayod si Job nga husto siya. Sa dihang nahibaloan nato, dinhi sa mga Kasulatan, nga adunay...nga mibisita kaniya kining mga tawhana; ang iyang mga miyembro sa iglesia. Ang tanan nga daw sa kaniadto pinangga niya nahimo nang batok kaniya, ug gipanguhaan pang pasanginlan siya ingon nga usa ka matagoong makasasala, tungod sa tanan niining mga butang nga nahitabo kaniya. Madunggan mo ang mga tawo, hangtud sa karon, moingon, "Giingnan ta na ka. Tan-awa na siya! Nakita mo kon unsay...?" Dili kana basta-basta na lang ang kamatuoran. Usahay Dios kini nga nagasulay sa Iyang mga tawo. Sa niining panghitabo, Dios kadto nga ginasulayan si Job, ang pinakamaayong tawo nga anaa sa yuta niadtong panahona. Karon, Iya siyang ginagunitan niadtto, tungod kay nahibalo Siya nga usa ka propeta si Job nga adunay panan-awon gikan sa Dios, nga eksakto niyang nahimo kung unsay gisulti kaniya sa Dios nga buhaton ug siya'y...Obligado ang Dios nga tumanon ang Iyang saad ngadto kaniya.

⁷⁷ Oh! Kinahanglan nga mamahimong ingon niana ang tanang Cristohanon. Sa dihang moabot na ang kaulahi panglimbasog sa kinabuhi, ug nagakagalkal na ang kamatayon sa atong tutunlan, gikinahanglan magmalig-on kita sa gihapon ug hinumdumon nga nag-ingon ang Dios, "Pagabanhawon Ko kamo sa kaulahi ang adlaw." Kita n'yo? Kinahanglan nga huptan kana-kana, ang atong pagpamatuod, ang atong puwesto kang Cristo, ang atong posisyon, kung unsa kita, sa pagkasayod nga

gituman nato ang matag Pulong sa Iyang kasugoan. “Bulahan sila nga nagabuhat sa Iyang mga sugo aron sila’y makabaton sa katungod sa pagsulod.” Kita n’yo? Ug sa diha nga nasayod kita, nga bisan unsa pa’y giingon ni kinsa man, natuman nato ang matag sugo nga atong makita sa Biblia, nga gihimo sa Dios kanato. . . nga giingon kanato nga buhaton, nga adunay pagtahud, ug gugma, ug pagtahud sa Magbubuhat Nga maoy nagsulat sa Biblia.

78 Moingon kita, “Tawo ang nagsulat Niini.”

79 “Ang tawo sa una, nga minandoan sa Espiritu Santo, maoy nagsulat Niini.” Kita n’yo? Kita n’yo, Dios ang nagsulat Niini pinaagi sa tawo. Sama sa usa ka propeta nga ginasulti ang Iyang Pulong, dili kini pulong nga iya sa propeta, Pulong kini sa Dios, kita n’yo, pinaagi sa propeta. Mao kana ang hinungdan nga gikinahanglan Kini nga matuman, kung kini man Kamatuoran gayud.

80 Karon, atong makita kining bantugan nga tawo. Ug, hinumdumi, wala’y Biblia nga mabasa si Job kaniadto sa iyang adlaw. Wala! Mipadayon lamang siya pinaagi og pagdihog. Usa siya ka propeta nga kang kinsa nagaabot ang Pulong sa Ginoo. Aduna siya’y—gikinahanglan lamang niya nga madihogan, tungod kay nahibalo siya sa iyang posisyon nga siya’y propeta sa Dios. Karon, ang butang lamang nga gikinahanglan mahitabo, mao ang pag-abot sa dihog diha kaniya. Ug kung ingon-ana nasayod siya nga kung unsa ma’y giingon niya mahitabo gayud, tungod kay pinaagi kadto sa pagdihog.

81 Ingon niana kung unsa ang iglesia, kung anaa kini sa kahan-ayan (nga nahan-ay), kini lamang. . . nahilandam na niini ang mekanika, gikinahanglan lang niini ang dinamika. Karong gabhiona, kung mahilandam na nato ang mekanika, mahitulid nato ang atong kasingkasing, ang mga butang nga mahimo natong buhaton, sundon ang matag Pulong, sundon nato Siya sa bautismo, sundon nato Siya sa matag han-ay nga Iyang giingon kanato nga buhaton, nga ipahilandam ang matag mekanika, ug motindog dinha; kung ingon-ana andam na kita alang sa pagkidlap sa dinamika, ug Dios lamang ang makahimo niana; ug kana aron nga igabutang ngadto sa imong kasingkasing kana nga pagtoo nga nagaingon, “Naayo na ako karon.” Kung ingon-ana wala na’y unsa mang kabilinggan kung unsa man ang kahintang, giayo ka na bisan unsa pa man; kay pagtoo kini, giayo ka na pinaagi sa pagtoo.

82 Aduna siya’y usa ka paagi sa pagpakighinabi sa Dios, nga naangkon niya pinaagi sa pagdihog. Aduna siya’y pamaagi sa pagpadaplin sa iyang kaugalingon, ug ginatugotan nga mosulod ang Dios. Ug nasayod siya nga gimatarung na siya. Usa kini ka gasa, usa kini ka gasa para sa mga tawo; dili para kang Job, kondili para sa mga tawo. Ingon niana ang

tanang kung unsa ang Balaanong mga gasa, aron nga pinaagi niini maalagaran ang mga tawo sa Dios. Dili tanang gimandoan nga mamahimong usa ka propeta. Dili kamo tanang...wala gimandoan sa pagpangampo alang sa masakiton. Tanang sila wala gimandoan nga mamahimong pastor, ug uban pa. Apan usa kini ka alagian nga giablihan sa Dios ngadto kanila. Ug mao nga sama sa nahisgotan nato sa maong leksyon kaganinang buntag, nga siya...Wala'y katungod ang usa ka tawo nga mosimang paingon sa alagianan sa uban nga tawo, bisan unsa pa ka dinihogan, bisan unsa pa ka ingon niana, unsa pa ka maayo... Pila man ang ania sa panagtigum kaganinang buntag? Tanawon daw nato ang inyong kamot. Kita n'yo? Kita n'yo, dili mo mahimo.

⁸³ Atua si David, nga ingon gayud ka dinihogan, nanggisinggit na ang tanang mga tawo ug ginahimaya ang Dios, sa usa ka hinungdan nga daw sa eksakto gayud sa Kasulatan, apan dili siya mao ang tukma nga tawo. Miabot unta kadto nga pagdihog kang Nathan, dili kang David. Kita n'yo, wala man lang gani niya gikonsulta si Nathan. Nakita n'yo ba kung unsay nahitabo? Kita n'yo, aduna kita'y...nag-ingon ang Dios nga Siya “dili magbuhat sa bisan unsa hangtud nga Iyang ipadayag Kini ngadto sa Iyang mga alagad ang mga propeta.”

⁸⁴ Ug si Job mao kining propeta sa iyang adlaw. Karon, ang butang gayud nga nahimo sa Dios ngadto kang Job: kung unsa man ang kanunay nga nagahatag kaniya og kaalam ug sa Iyang Pulong ug pagdihog, dili siya niadto makakuha og pagdihog. Apan nahibalo siya sa tanang niyang mga mekanika (naghalad siya og halad nga sinunog, nahimo niya ang tanang nga nahibaluan niya nga angay'ng buhaton), apan wala siya'y madawat nga usa ka pulong gikan sa Dios. Apan dili siya matarog sa Yawa! Tan-awa.

⁸⁵ Karon, tan-awa kung gikaampo ka. Dili mo na kinahanglan nga modagan pa pabalik sa linya, o magpaampo sa uban. Sa dihang nasayod ka nga eksaktong nahimo mo na kung unsay giingon kanimo sa Dios nga buhaton, kita n'yo, kung ingon-ana maghulat alang nianang alagian sa dihang nga maablihan alang kanimo, ug, “Karon giayo na ako!” Pagmoabot na kini dinha, natapos na kini kung ingon-ana. Oh, dili ka na nga magkinahanglan pa og mga linya sa pagpaampo, wala na'y bisan unsa pa, natapos na kini! Nahipadayag na kini kanimo! Kita n'yo?

⁸⁶ Sama gayud niadtong tigulang na nga propeta niadtong pag-abot ni Ginoong Jesus, nasayran nato nga nahipadayag kadto kaniya, ang tigulang na nga manggialamon, nga “dili siya mamatay gawas kung nakita na niya ang Cristo sa Ginoo.” Ug gitooan niya Kana, ug nagpaabot siya Niini. Ug ang mga tawo nagdahum nga buang siya, nga nawala na sa iyang pangisip ang maong tigulang nga tawo. Apan gitooan niya Kini sa

gihapon! Walay makapatay-og kaniya gikan Niini, nasayod siya nga gipadayag Kini kaniya sa Dios, kay ang Biblia nag-ingon, “Gipadayag Kadto kaniya sa Espiritu Santo.”

⁸⁷ Nagasulod si Simeon sa Templo niadtong higayona, miduol ug naghatag og pagdalayeg ngadto sa Dios, ug miingon, “Itugot nga ang Imong alagad magabiya na nga malinawon.” Sa dihang gikugos niya ang maong masuso, “Nakita na sa akong mga mata ang kaluwasan gikan Kanimo.” Kita n’yo, nahibalo siya nga makita niya Kini. Bisan unsa pa kadaghang mga masuso ang maduolan niya matag adlaw, nasayod siya nga gipadayag kaniya sa Dios nga makita niya ang Cristo sa dili pa siya mamatay. Gitooan kana ni Simeon.

⁸⁸ Karon pag-napadayag na kini *kanimo*, nga ikaw mismo nadawat mo ang saad sa Dios; ang dihog, kanimo ingon nga Cristohanon, miabot kini kanimo, wala mo na gani kinahanglana pa ang linya sa pagpaampo. Ang butang. . . ang butang lang nga imong gikinahanglan maoy usa ka abli nga kasingkasing sa diha nga andam na ang tanang mekanika, ug tugotang moabot ang dihog, ug dayon wala na’y bisan unsa pa nga makapausab sa imong hunahuna; naangkon mo na kini. Gawas niana, wala kini mahatag nga kaayohan.

⁸⁹ Karon himatikdi, nagkinahanglan si Job og usa ka alagian sa dihog, napaabli niya kini. Aduna siya’y alagian sa pagpakighinabi sa Dios, pinaagi sa iyang dihog. Aduna siya’y paagi mga mapadaplin niya ang iyang kaugalingon ug tugotan nga mosulod ang Pulong sa Dios. Himatikdi kung giunsa nila—kung giunsa nga mangabot sila aron konsultahon siya nga gikan pa sa Sidlakan ug gikan pa sa Kasadpan, mga tawo nga mangita kaniya tungod kay nasayod sila nga kung unsa ma’y giingon ni Job mao ang Kamatuoran. Nasayod sila nga misulti sa Kamatuoran kanang tawhana. Tungod kay, kung unsa ma’y iyang gipropesiya, mao kana kung unsay mahitabo! Ug busa mangabot ang mga tawo nga mga gikan pa sa Sidlakan ug Kasadpan.

⁹⁰ Moingon siya nga moadto siya sa kamerkadohan, ang mga batan-ong prinsipie gikan sa Sidlakan mangyukbo sa iyang atubangan, aron lang nga makadungog og usa ka pulong nga makapalipay gikan kaniya, sa iyang kabantugan ug gamhanang kaalam, kay nasayod sila nga matinuuron ang maong tawo. Dili niya gustong ipasigarbo ang iyang kaugalingon, wala siya’y mga kinaugalingong tumong, wala’y mga paggamit og impluwensiya aron manghimulos, usa lang gayud siya ka matinud-anon nga propeta sa atubangan sa Dios. Ug aduna sila’y pagsalig kaniya, ug mangabot ang tanan gikan pa sa Sidlakan ug Kasadpan aron lang nga makapakighinabi kaniya sa kadali. Gihisgotan siya, sa Biblia dinhi. Apan, nakita n’yo, nakulangan siya niadtog dihog aron maingnan siya bahin sa kung unsa kini tanan. Gitugot kadto sa Dios nga mahitabo, wala siya gisultihan.

⁹¹ Dayon, usa ka adlaw, nahibaloan nato nga dinha, kadto ang panahon nga . . . Ang tanan, samtang nga matabangan mo pa sila, “Maayo.” Apan sa diha nga gusto na nilang mosukwahi kanimo, dinha na nagasulod ang problema. Apan siya lang ang nasayod nga husto siya; sa pagpitik sa iyang pagtoo, sa pagpatalinghug sa Pulong sa Dios nga nagasulti ngadto kaniya, nasayod siyang Kini ang Kamatuoran. Oo, sir! Nakaila siya sa Tingog sa Dios. Walay makalimbong kaniya bahin Niini, kay nakaila man siya Niini. Kini . . . Apan sa diha nga ikaw . . . adunay butang nga nahipadayag kanimo, supak man tingali sa kung unsay hunahunaon sa mga tawo . . . Karon, nagasulti ako sa linya sa mga propeta. Pag-Dios na ang nagapadayag sa usa ka butang, nga, kung aduna ma’y usa ka tinago nga nagaabot gikan sa Dios nga igapadayag ngadto sa mga tawo, dili gayud kini moabot sa usa ka seminaryo, dili gayud kini moabot sa usa ka grupo sa mga tawo, wala gayud kini nahitabo. Kini kanunay nagaabot, miabot, ug magaabot, pinaagi sa usa ka tawo, sa usa ka propeta! Amos 3:7, kita n’yo, “Ang Ginoo dili magbuhat og bisan unsa gawas una nga Iya Kining ipadayag pinaagi sa Iyang mga propeta.”

⁹² Ug, karon, si Job adunay butang nga problema niya, apan dili niya makuha ang dihog, ug nagpahingawa kini kaniya, ug kana . . . sa dihang mapaingon ka nianang matang sa kahimtang, dinha kon diin ang kaaway nagasulod sa matag higala, halos, nga anaa ka. Ug gisugdan nilang pasanginlan siya. Oh, siguradong usa kadto ka maalaut nga butang alang kaniya ang mahibaloan nga gipasanginlan siya sa iyang mga higala, moadto dayon si Satanas ug modapig mismo sa kaaway. Dinha kon diin nagasulod si Satanas, “Itugyan siya kanako, ug himoon kong magapasipala siya Kanimo sa Imong . . . Ipasalikway ko kaniya ang iyang Mensahe. Himoon kong magapasipala siya Kanimo. Ipabalik ko siya ug ipasulting ‘Sayup tanan Kadto.’” Dayon gisulayan niya siya sa tanan nga mahimo niya, ngadto sa tanan nga mga suud nga tawo ug mga higala nga aduna siya sa una. Apan malig-on nga mibarug si Job, kay nasayod siya nga nadungog niya ang Tingog sa Dios!

⁹³ O Dios, tabangi ako, ugma sa gabii, nga makuha ko kanang *Mga Pako sa Salampati*. Kita n’yo, nadungog ko ang Tingog sa Dios nga nagsulti sa kung unsa, ug mamahitabo kini sa ingon nianang paagi! Sama lang sa pagkahitabo sa uban pa niining mga butanga, mamahitabo kini!

⁹⁴ Karon, nasayod si Job nga mamahitabo kadto. Ug nasayod siya nga gisulti sa Dios kadto kaniya, nga siya’y “matarung.” Apan gihimo nila siyang usa ka makasasala, busa naghulat siya niadto og pagdihog. Ningsulod si Satanas sa tanan nga— nga mga tawo ug miabot kini sa . . . iyang mga maglilipay, kuno, ug ginapasanginlan siya, apan wala kini nagpatarog kaniya ni diyutay. Apan sa diha na nga ang Pulong sa Dios

napanghimatud-an ngadto kaniya. . . Nadungog niya ang Dios sa igdulongog pinaagi sa pagpatalinghug, apan usa niana ka adlaw samtang nga naglingkod sa gawas nga atua sa pinakaubos niyang kahimtang. . . Ug samtang nga naglingkod siya didto, ug ang tanan na'y namasangil kaniya, nga bisan ang iyang asawa gisultihan siyang “sayup” siya, ginakagis niya niadto ang iyang mga kabahong. Ug miabot si Elihu ug gisaway siya ingon nga mahakogon, sa paagi nga ginabasol niya ang Dios ug uban pa.

⁹⁵ Ug dayon sa niadtong higayona miabot ang pagdihog kaniya, niadtong misugod na pagkidlap ang kilat, nga misugod na og dahonug ang mga dalogdog, kadto ang higayon nga miabot ang pagdihog sa maong propeta, ug mitindog siya, ug miingon siya, “Nasayod ako nga ang akong Manunubos buhi! Ug sa kaulahian nga mga adlaw Siya motindog sa ibabaw niining yuta. Bisan pa nga laglagon sa ulod-sa-panit kining lawasa, bisan pa man sa akong unod makita ko ang Dios, Nga makita ko mismo.”

⁹⁶ Nakita niya. . . Nahisgotan niya ang bahin sa mga kahoy, ang kinabuhing botanika, kung unsa nga nagakamatay kini ug nagakabuhi pag-usab; nga tubig ang nagapabalik niini, ang baho sa tubig, ang kahumut sa tubig, ang resulta sa tubig nga nagabisbis sa usa ka kahoy o kung unsa man, usa ka binhi nga nalubong sa yuta. Miingon siya, “Apan matumba ang tawo ug mabugtoan og gininhawa, mangabot ang iyang mga anak aron mohatag og pagpasidungog ug siya dili mahibalo niini. O nga Imo unta ako itago sa lubnganan” (Job 14) “hangtud nga mahupay ang Imong kaligutgut.” Ingon niya, “Apan kung ang tawo mamatay, mabuhi ba siya pag-usab? Sa tanang adlaw sa akong pagpakigbisog, mohulat ako hangtud nga moabot ang akong pagkabalhin. Pagatawagong Mo ako, ug ako magatubag. Nagtagana Ka kanako og mga utlanan nga dili ko mahimong lagpasan,” ug uban pa. Nasayod siya niining mga butanga. Gibantayan niya ang pagkabuhi sa kahoy, apan unsa'y nahitabo sa tawo sa dihang namatay siya? Wala siya nabuhi pag-usab. Mao nga, gipakita kaniya sa Dios kining Manunubos.

⁹⁷ Gusto niyang makita kung aduna ba'y makahimong mangaliya alang kaniya. Nangaliya na siya alang sa daghan nang mga tawo, apan karon aduna ba'y makahimo sa pagpakig-estorya alang kaniya? Aduna ba'y makahimo sa pagpandong sa iyang kamot kang Job, o sa usa ka tawong makasasala ug nga usa ka Balaang Dios, ug nga makataytay sa dalanon? Mahimo ba siyang moadto sa Iyang balay ug manuktok sa pultahan? Ablihan kaha Niya ang pultahan ug makighinabi kaniya sa makadiyut?

⁹⁸ Apan, dayon, sa diha nga ang dihog miabot ngadto sa iyang kasingkasing, makita na dayon niya ang Dios. Nagpangidlap ang mga kilat, nanggidahunog ang mga dalogdog. Ug pagkahuman niini, mitindog siya, ug nag-ingon siya, “Nasayod ako nga ang akong Manunubos buhi! Akong Manunubos, ug sa kaulahiang

mga adlaw Siya motindog sa ibabaw sa yuta.” Kita n’yo, nasugdan niyang makita ang tubag sa Dios sa iyang pagtoo.

⁹⁹ Karon, nagakahibulong kita kung makita kaha nato ang Dios. Aduna ba’y paagi nga kita makakita Kaniya? Karon, kadto ang bugtong paagi nga aduna ang Dios, ang sulayan si Job. Miingon siya, “Nakadungog ako mahitungod Kanimo, tungod sa pagpamati pinaagi sa igdulungog, apan karon nakita ko Ikaw. Apan karon nakita ko Ikaw, pinaagi sa akong mata.” Ang panan-awon mahitungod sa dili-makita nahimo nang klaro. Nakita niyang nangalukot ang panganud, nadungog niya ang pagpangidlap sa kilat, o nakita kini. Ug nasaksihan ang sige nga pagdahunog sa dalogdog, tingali sa usa ka maayong tiyempo nga adlaw, ug nakita niya ang Dios nga atua niadtong panganud ug niadtong kilat. Makita niya ang Dios, sa natural niyang mata, Kita n’yo, tungod kay nahimo nang makita ang dili-makita. Ang makita nga panan-awon sa uban napanghimatud-an niadto, nga klaro, sa natural nga mata.

¹⁰⁰ Sama lang sa pagtoo nga may binuhatan, nga atong gihisgotan kagabii. Si Abraham, wala . . . wala’y Biblia usab nga mabasa kaniadto, apan usa siya ka propeta, sa iyang panan-awon ug sa iyang pagtoo. Ug mora og sayup para sa uban nga mohunahuna siyang ingon niana, nga mohunahuna siya nga makaanak sila. Apan nakaanak gayud sila, tungod kay ang panan-awon mahitungod sa maong bata mao kung unsay iyang ginahisgotan, “Magkaaduna ko niini! Magkaaduna ko niini!” Apan sa dihang natawo na ang maong bata, makita na dayon sa ubang mga tawo pinaagi sa mata kung unsa ang nakita niya niadto sa usa ka panan-awon. Ug sa diha nga lihokan mo kung unsa ang ginatoohan mo diha sa imong kasingkasing, kung ingon-ana mailhan sa mga tawo ang Dios, ug mahibalo kung unsay nagakahitabo kanimo, sa mga pamaagi sa imong paglihok. Ingon niana kung unsaon mo pagkakita sa Dios pinaagi sa mata. Apan ngadto kaniya, maayo ang tanan nga nabuhat niya, ang tanan nga nabuhat niya alang sa uban, nagkinahanglan lang siya sa kung kinsa nga makapangaliya alang kaniya. Sa dihang miabot ang pagkapanganak sa iyang bata, si Isaac, ang—ang dihang nga miagak kaniya ngadto niini maoy nagpanghimatud sa iyang panan-awon hangtud sa punto nga makita sa mga tawo nga kung unsay iyang nakita sa panan-awon mao gyud ang Kamatuoran.

¹⁰¹ Karon, usahay kini nga mga pagpitik sa pagtoo nagaabot mismo sa panahon sa kalisdanan. Kalisdanan sa kasagaran ang nagadala kanato ngadto niini. Kalisdanan kadto ang naghatud kang Job ngadto niini. Aba, atua na siya sa katapusan sa iyang kinabuhi. Patay na ang iyang mga anak; ang iyang mga kamelyo. Ug ang tanan niyang mga katigayonan nangawala na ug nangawagtang. Ug sa kaugalingon niyang kinabuhi, gituboan siya og mga kabahong gikan sa kinaibabwan sa iyang ulo

hangtud sa mga lalalapa sa iyang tiil. Usa kadto ka kalisdanan, gipakiglimbasogan sa iyang kaugalingon, dinha nga punto nga miabot ang pagdihog kaniya.

¹⁰² O kalalaken-an ug kababayen-an, sa niining gabhiona, kung mahimo ninyo nga tan-awon ang palibot ug makita kung unsa na kita ka duol ngadto sa Pag-abot sa Ginoo. Kamo nga nagpalangay-langay sa bautismo sa Espiritu Santo. Mahimo kamo tingaling saligan diha sa kung unsa nga sensasyon, o sa butang nga inyong nangahimo nga masundog man ni Satanas, ug dili mahimong mosulod kaninyo ang tinuod nga Espiritu aron bug-os nga ubanan kamo sa mga saad sa Dios. Unsaon man sa usa ka tawo nga nagaangkon nga adunay Espiritu Santo nga isalikway ang usa man ka Pulong niining Biblia, ingon nga kuno, “dili husto”? Dili mo mahimo kini!

¹⁰³ Bisan unsa ka pa ka relihiyoso, pila pa ka iglesia ang gipamyembrohan mo, pila pa ka mga libro nga gilistahan sa imong ngalan, kung kanang tinuod nga Espiritu Santo anaa kanimo (nga mao kining napadayag nga Pulong), makita mo ang Mensahe ug ang mao na nga takna, tungod kay Espiritu Santo ang nagabuhat niini. Apan kinahanglan adunay butang nga mopasiga niana, ang dihog nga moabot kanimo. Ug kung adunay . . . kung ibubo mo man ang tubig diha sa yuta, sa yuta, diha sa yuta, ug nga walay binhi dinha nga buboan niini, unsaon man niini pagpatubo sa kung unsa man? Wala dinha og bisan unsa man nga mahimong patuboon niini. Kadtong, kadto lang ang mga Pinili sa Dios ang makakita Niini.

¹⁰⁴ Nakita Kini sa mga Pinili sa Dios sa panahon ni Noe, sa panahon ni Moises, sa panahon ni Jesus, sa panahon sa mga apostoles, sa panahon ni Luther, sa panahon ni Wesley, sa panahon sa Pentecostal, tungod kay mao kadto ang Binhi nga atua sa yuta sa dihang gibubo kining pagdihog. Karon samtang nga ginabubo ang maong pagdihog, aron tigumon tanan ang Pangasaw-onon, kadto lang ang mga Pinili ang makakita Niini. Nag-ingon si Jesus, “Nagapasalamat Ako Kanimo, Amahan, nga kining mga butanga gililong Mo sa mga mata sa mga makinaadmanon ug sa mga masinabuton, ug gipadayag Kini ngadto sa mga gagmay’ng bata nga andam makakat-on.” Karon, gikinahanglan nga maabtan kini og pagdihog.

¹⁰⁵ Karon, sa diha nga miabot kaniya ang pagdihog, mao na kadto. Atua na Kini kaniya kung ingon-ana! Karon, nahibaloan nato, adunay moabot nga panahon niining mga kalisdanan sa diha nga mopadayon ang pagpanglisod-lisod. Ug tan-awon ninyo ang palibot karon, tan-awa na ang kahimtang nga gikapuy-an nato. Dili ba kita nagapuyo na sa usa ka moderno nga Sodoma ug Gomora? Wala ba mibalik ang kalibutan? Usa kadto ka kalibutan sa Gentil nga gilaglag kaniadto, pinaagi og kalayo. Dili ba nag-ingon si Jesus, diha sa San Lucas, sa ika-17 nga kapitulo, sa ika-28, ika-29, ug sa ika-30 nga bersekulo,

nga, “Maingon usab sa nahitabo kaniadto sa mga adlaw sa Sodoma, maingon man usab niini sa pag-abot sa Anak sa tawo, sa diha nga ginapadayag na ang Anak sa tawo”? Unsa man ang “gipadayag”? Mao ang pagpahibalo sa tinago, usa ka pagpadayag; ang pagpadayag ug pagpahibalo sa usa ka tinago.

¹⁰⁶ Karon, kining mga butang nga dugay nang natago sa tanang mga kapanahonan sa iglesia ginapadayag na karon, gipahibalo na. Karon, mahimo natong ingnon nga, ug kung wala kana gipanghimatud-an sa Dios, sayup kana. Kita n’yo, wala ang Dios nagkinahanglan og si kinsa man nga mohubad sa Iyang Pulong, Siya Mismo ang Iyang maghuhubad. Nag-ingon Siya, “Magasamkon ang usa ka ulay,” ug nagsamkon siya. Nag-ingon Siya, “Magkaaduna og kahayag,” ug nagkaaduna gayud. Ug wala kita nagakinabuhi sa kapanahonan ni Luther, sa kapanahonan ni Wesley, o sa kapanahonan sa Pentecostal. Ang kapanahonan sa Pentecostal usa lang ka pagpasig-uli sa mga gasa nga nagabalik sa iglesia, apan nagakinabuhi na kita sa panahon sa kagabhion, nagapuyo na kita sa panahon sa pagtawag pahigawas sa Pangasaw-onon.

¹⁰⁷ Ug kung unsa kalisod gayud kaniadto sa mga Katoliko nga makita si Luther, ug ang mga kang Luther nga makita si Wesley, ug ang Penteco-... ang mga kang Wesley nga makita ang kapanahonan sa Pentecostal, maingon usab kalisod alang sa mga Pentecostal nga makita *kini* nga kapanahonan. Ingon na niana kini sa una pa, tungod nga gibubo Kini sa Pinili nga Binhi, ug sa kana lamang. Mao kana kung unsa ang ginatudlo sa Biblia. Dili nila Kini makita, nag-ampo pa gani si Jesus alang kanila, miingon, “Mga buta sila, wala nila maila kini.” Ang Pinadayag nagaingon kanato, nga sa niining kapanahonan sa iglesia sa Laodicea, sa diha nga gipahigawas Siya sa iglesia, nga sila’y “hubo! kabus! makalolooy! buta! ug walay pagpanghibalo niini.” Mibalik pag-usab, nga dili nila Kini makita, dili makasabot Niini. Bug-os na silang nagapus sa mga tradisyon!

¹⁰⁸ Apan hinumdumi ang gisaad nga Pulong sa Dios pinaagi sa baba ni Jesus Cristo, ang mismong Dios nga gisulti ang linalang ngadto sa pagkatungha, Siya ang Usa sa wala pa ang pagkatukod sa kalibutan nga mao ang nagsulti sa maong mga Pulong, “Ug magkaaduna,” ug nga nagkaaduna gayud. Kay Siya miingon, “Siya dinhi na sa kalibutan, ug ang kalibutan nahimo pinaagi Kaniya, ug ang kalibutan wala makaila Kaniya. Apan sa tanan nga nakaila Kaniya, kanila naghatag Siya’g kagahum sa pagkahimong mga anak sa Dios.” Ang pinaka-Magbubuhat, ang pinaka-Magbubuhat Mismo, sa dihang gibanhaw Niya si Lazaro gikan sa mga patay, miingon Siya, “Ayaw hunahunaang talagsaon kini, tungod kay nagasingabut ang takna sa diha nga ang tanan nga anaa sa lubnganan managpakabati sa Tingog sa Anak sa tawo, ug manggibangon.” Ang Dios mismo nga nag-

ingon “Magkaaduna og Kahayag,” miingon “Pabangonon sa Tingog sa Anak sa tawo ang kadtong mga anaa sa lubnganan.” Mahitabo gayud kini sa tukmang panahon niini. Gisulti Niya, “Magkaaduna og lalaki og babaye,” ug uban pa, ug ang tanan niini, sa mga katuigan ug ginatus ka mga katuigan sa dili pa kini nahitabo.

¹⁰⁹ Miabot ang pagdihog kang propetang si Isaias, miingon siya, “Alang kanato ang usa ka bata natawo, ang usa ka anak nga lalaki gihatag. Ang Iyang Ngalan pagatawgon og Magtatambag, Prinsipe sa Pakigdaít, Dios nga Makagagahum, Amahan nga walay katapusan.” Nangagi ang mga katuigan, mga bulan, mga katuigan, mga adlaw, mga semana, mga tuig nga nanglabay, ginatus ka mga katuigan nga nanglabay. Human sa walo ka gatus ka tuig, si Emmanuel natawo pinaagi sa usa ka ulay! Ngano man? Tungod kay gisulti kadto pinaagi sa mga ngabil sa dinihogang propeta sa Dios, usa ka binhi nga migawas. Kita n’yo? “Ug sa nianang bililhong takna,” miingon, “magahangyo kamo . . . magahangyo kamo Kanako og usa ka panan-awon o usa ka ilhanan.”

¹¹⁰ Ingon Niya, “Pagahatagan Ko sila og usa ka ilhanan, usa ka walay-katapusing ilhanan, ‘Magasamkon ang usa ka ulay,’ usa ka walay-katapusing ilhanan.”

¹¹¹ Karon, atong makita nga sa maong mga takna sa grabeng kalisud, mao kana kasagaran ang panahon nga molihok ang Espiritu sa Dios. Gitugotan Niyang ipalakaw ang mga batang Hebreohanon pasulod mismo ngadto sa nagakalayo nga hudno, sa wala pa Niya gilihok ang Iyang kamot. Apan sa diha nga molihok Siya, nagapanglihok gayud Siya.

¹¹² Karon, atong mahimatikdan nga dinhi sa Lucas, sa—sa ika-17 nga kapitulo, ug sa ika-30 nga bersekulo, nga nag-ingon Siya, “Sa kaulahiang mga adlaw, nga igapadayag na sa Anak sa tawo ang Iyang Kaugalingon sama sa Iyang gibuhát sa wala pa gayud ang Sodoma ug Gomora, ug magakahitabo ang mao ra gihapong mga kahimtang.” Gihisgotan Niya ang bahin kang Moises, bahin kang . . . ug pasayloa ninyo ako, dili ang bahin kang Moises, kondili ang bahin kang Noe. Kung giunsa nga ang mga tawo kaniadto “nanagpangaon, nanag-inum, ug uban pa, nanagpangasawa og nanagpamana ug nanagminyoay.” Dayon miabot Siya, ingon Niya, “Karon, maingon sa nahitabo kaniadto sa mga adlaw ni Lot, maingon usab kini sa panahon nga ginapadayag na ang Anak sa tawo.” Karon, bantayi, nahipadayag kaniadto ang Anak sa tawo ngadto sa grupo ni Abraham, ingon nga usa ka tawo, usa ka propeta diha sa porma nga tawhanong lawas, usa ka ordinaryong lalaki nga naabugan ang Iyang bisti, ug gitawag Siya ni Abraham “Elohim.”

¹¹³ Karon, ginasaad ni Jesus dinhi nga sa kaulahiang mga adlaw ang Anak sa tawo igapadayag pag-usab ngadto nianang mao

rang matang nga grupo, ang harianong Binhi ni Abraham, sa dili pa mangahulog ang kalayo. Hinumdumi, ang iglesia wala na nakadawat og uban pa nga saksi, si Abraham ug sila wala na nakadawat og uban pa, ang ilang ginapaabot nga gisaad nga anak nga lalaki gihatud dayon human niadto. Ug nagapaabot ang iglesia alang sa Gisaad nga Anak nga Lalaki, magaabot Siya pagkahuman mismo sa mga adlaw niini nga ministerio, Siya'y igapadayag gikan sa kalangitan. Karon, makita nato kini sa klaro kaayo, ingon niana gayud. Karon, ang bugtong butang nga gikinahanglan mahitabo mao nga adunay butang nga nagapitik, nga nagasulod sa usa ka tawo, ang Dios nga nagapanghimatuod ug nagasulti kaniya ug nagapakita kaniya nga mao kana ang mahitabo nga butang; ug nga himoon mong . . .

¹¹⁴ Sama sa gibuhat ni Moises, dili niya gusto kaniadto nga luwason kadto nga mga kaanakan, apan nagsulti ang Dios kaniya diha sa usa ka sapinit nga nagakalayo. Dili niya gustong moadto, apan gikinahanglan siya nga moadto. Nadungog na ni Moises ang mahitungod Kaniya ingon nga mao ang gamhanang Jehovah. Apan dayon makita na niya Siya, nga atua Siya sa porma sa usa ka Haligi nga Kalayo. “Nakadungog ako mahitungod Kanimo, apan karon makita ko na Ikaw.” Unsa ma'y iyang nakita? Ang Iyang Pulong nga gipanghimatud-an.

¹¹⁵ Giingnan sa Dios si Abraham nga “ang iyang katawhan mahimong dumuloong sa yuta sa laing mga tawo sulod sa upat ka gatus ka tuig, apan Iya silang ipahigawas pinaagi sa usa ka gamhanang kamot.”

¹¹⁶ Ug, himatikdi, kining nagakalayo nga sapinit nagpanghimatuod sa kung unsay giingon ni propetang Abraham nga mahitabo. Miingon si Moises, “Nakadungog ako bahin niini, apan karon akong nakita kini!”

¹¹⁷ Karon, nakadungog *kita* nga sa kaulahiang mga adlaw ang Anak sa tawo motungha sa taliwala sa Iyang mga tawo ug igapadayag ang Iyang Kaugalingon ngadto sa mga tawo diha sa mao gihapong paagi nga gibuhat Niya kaniadto sa . . . sa wala pa gayud ang paglaglag sa Sodoma. Ang Anak sa tawo, unsa ma'y Iyang gibuhat? Nahibaloan Niya ang mga tinago nga atua sa kasingkasing ni Sarah. Gihatag usab ang saad ngadto kang Abraham. Nakadungog si Abraham sa Tingog sa Dios, nakakita na siya tingali Kaniya sa daghan nang nagkalainlaing mga pamaagi (Wala ako mahibalo kung giunsa Niya pagpakigsulti kaniya, pinaagi man sa mga damgo o sa mga pagpropesiya), pero sa niining higayona nakita niya Siya. “Nakadungog ako mahitungod Kanimo, karon nakita ko na Ikaw.”

¹¹⁸ Ug nakadungog na ang iglesia mahitungod sa Dios, nabasa nila ang mahitungod Kaniya, ug kung unsay Iyang gipangbuhat, ug ang mga saad nga Iyang gisaad, apan karon makita na nato Siya sa atong mga mata (sama gayud sa nabuhat ni Job),

“Nakadungog ako mahitungod Kanimo, apan karon makita ko na Ikaw.” Sus! Daw sa unsang pagkalahi.

119 Si Moises, sa niadtong kalisdanan, mituaw. Ug nasayran nato, sa Exodo, sa ika-14 nga kapitulo, sa ika-13 ug ngadto sa ika-16 nga bersekulo, si Moises nga atua niadtong dakung kabug-aton didto nga kauban ang kaanakan sa Israel, miabot kaniya ang pagdihog, ug gisulti niya ang kung unsay angay niya kaniadtong isulti, nga wala’y panghibalo nga nasulti niya kadto. Kita n’yo, “Pabilin sa inyong nahimutangan ug tan-awa ninyo ang kaluwasan sa Dios.” Dili pa nakigsulti ang Dios kaniya. Kita n’yo, miabot kaniya ang pagdihog.

120 Nanag-ingon sila, “Nganong gidala mo man kami pagawas dinhi? Nangamatay na lang unta kami didto sa Egipto. Tungod ba kay walay mga lubnganan didto? Gidala mo kami dinhi, ug pasagdan nga mangamatay; nahimo unta nga nanagkinabuhi kami diha sa kalinaw ingon nga mga ulipon hangtud nga kami mangamatay, apan imo kaming gidala dinhi.”

121 Si Moises, usa ka propeta, nga nasayod nga aduna siya’y koneksyon ngadto sa Dios, gidihogan, ug miingon siya, “Pabilin sa inyong nahimutangan ug inyong makita ang kaluwasan sa Dios; kay ang mga Egiptohanon nga inyong hikit-an karon, dili na gayud ninyo silang hikit-an pag-usab.” Giunsa man niya pagkahibalo nga mahitabo kadto? Giunsa man niya pagkahibalo? Wala siya nahibalo kung unsa ang iyang nasulti.

122 Apan pagkahuman mismo nga nasulti na niya kadto, gisultihan siya sa Dios kung unsaon pagbuhat kadto. Miingon, “Moises, ayaw pagtuaw Kanako, kupti ang imong sungkod sa imong kamot ug ituy-od kini ibabaw sa dagat, ug ingna ang mga kaanakan sa Israel nga ‘Manglakaw na!’” Amen!

123 Ang pagdihog! Sa ingon niana kini nagaabot kanimo kung aduna ka’y sakit. Sa ingon niana kini nagaabot kanimo kung ikaw nagaantus. Adunay butang nga nahipadayag kanimo, ug makita mo nga nahipadayag kini, mosulti kang, “Ayo na ako!”

124 Ginasultihan ka dayon sa Dios kung unsay buhaton, “Pagtindog ug paglakaw na.” Amen! Kung ingon-ana tapos na kini tanan, sa diha nga mahimo mo kini sa ingon nianang paagi. Ingon nianang paagi ang pagbuhat niini sa Dios, makita mo na dayon nga nahipadayag ang Dios pinaagi sa imong kaugalingon.

125 Ang Dios ang nagsulti kaniya nga buhaton kadto. Karon, kung ingon-ana, ang tanan nga atua kaniadto, ang tanan sa Israel nga atua kaniadto nakakita sa pagdihog nga miabot kang Moises. Nakita nila ang Dios, sa kaugalingon nilang mata, nga gihuyop kadtong tubig pasibog ngadto sa matag daplin. Ug gipangunahan sila niadtong Haligi nga Kalayo patabok mismo sa—sa dagat. Nadungog niya ang mahitungod sa Dios, dayon nakita nila ang Dios.

¹²⁶ Atua niadto sa usa ka makuyaw nga takna si Josue, sa dihang ang maong mga kasundalohan nagapangalagiw na, ug nga pasalup na ang adlaw. Usa ka propeta si Josue, ug nasayod siya nga kung makahigayon nga magkatigum pag-usab kadto nga mga kasundalohan ug sulongon siya, mapatyan siya og dugang pa nga sundalo, busa sa niadtong makuyaw nga takna sa dihang adunay butang nga gikinahanglan buhaton. . . Adunay usa lang ka butang, kung padayon niyang mapakalagiw sila, mapapas niya sila, tagsa-tagsa, mapatay. Apan wala na'y igong kahayag aron buhaton kini, busa si Josue mitindog, gibayaw ang iyang mga kamot, miingon siya, “Adlaw, humunong ka! Ug bulan, magpabilin ka sa Ajalon hangtud mahuman na ako niining maong gubat.” Ug mihunong ang adlaw. Nadungog nilang nagsulti si Josue, ug dayon nakita nila ang Dios, sa kaugalingon nilang mga mata, diha sa pagpamuhat. Tinuod gayud!

¹²⁷ Kita n'yo, siyempre, usa kadto ka daw sa dili-katoohan nga makita ang usa ka butang nga daw sa imposible, apan tinuod kini. Apan, “Mihunong ang adlaw,” ang ingon sa Biblia. Wala ka kahibalo kung unsa ma'y hunahunaon ninyong mga tawo, nga nagahunahuna nga ang kalibutan ang maoy nagatuyok, karon; apan, bisan pa man, “mihunong ang adlaw.” Wala gayud tingali nasulayan ni Josue nga hunahunaon kung unsaon niya sa—sa pagbuhat kadto, kung unsaon kadto sa pagbuhat sa Dios, ang butang lang nga giingon niya maoy, “Adlaw humunong ka!” Nasulti niya kadto, nga walay pagkasayod tingali kung unsay iyang ginaingon, tungod kay Dios ang naghatag niini kaniya, ug Siya ang namuhat.

¹²⁸ Mao ra gihapon nga butang diha sa Marcos 11:23, “Kung magaingon ka niining bukid ‘pahawa,’ ug dili magduhaduha sa imong kasingkasing, kondili toohan nga kung unsa ma'y imong giingon mamatuman, maangkon mo kung unsay imong giingon.” Apan dili ka mahimong motindog didto nga moalang-alang sa imong hunahuna ug nga moingon niini, kinahanglan nga dinihogan ka sa pagsulti niini. Amen!

¹²⁹ Pasayloa ko sa maong panultihon; apan niadtong adlaw, nga naglingkod didto niadtong kakahoyan (ug ang Dios maoy akong maghuhukom, ug mahimo pa akong matumba'g mamatay niining pulpito), sa dihang gipahunahuna gayud ako niadto nga Kasulatan sa tibuok kong kinabuhi. . . sa paglingkod ko didto sa mga kakahoyan niadtong buntaga, ug nagahunahuna ako niadto bahin niana, ug misulti kanako ang kadtoong Tingog, miingon Siya, “Kana nga Kasulatan pareho ra sa tanang mga Kasulatan, matuod Kini.”

¹³⁰ Ug nahunahuna ko, “Bueno, unsaon man pagkahitabo niini?”

¹³¹ Ug miingon Siya, “Ikaw. . .” Ingon ko. . . Miingon Siya, “Sumulti ka, ug mamahitabo kining ingon niana. Ayaw pagduhaduha Niini.”

132 Ug Aduna ako'y ginapakig-estoryahan niadto, didto sa halayong mga kakahoyan. Walay mga squirrel, sa tulo na ka adlaw nga atua ako didto, wala gyu'y mga squirrel didto. Ug atua ako didto sa usa ka kalibunan sa mga sikamoro. Wala man lang mga squirrel nga moduol. . . ang si kinsa man nga nagapangayam og mga squirrel, nasayod nga wala sila sa sikamoro. Ug dugay na akong naglingkod didto; ug kusog kaayo nga nagahaguros ang hangin, sa mga alas diyas sa buntag, ug nagahunahuna pag-usab ako niadto.

133 Ug nag-ingon Kini, "Nagapangayam ka, ug nanginahanglan ka og mga squirrel sama lang nga nanginahanglan si Abraham niadto og usa ka lakeng carnero."

134 Hunahuna ko, "Kana kanunay ang nagasulti kanako sa Kamatuoran, apan kini medyo kataw-anan." Ug mitindog ako sa kon asa ako niadto naglingkod, mitan-aw sa tanang palibot, "Asa kaha kanang Persona nga nagapakig-estorya kanako?" Wala'y bisan unsa man; hangin lang nga kusog mohaguros. Ug nahunahunaan ko, "Dili kaha ako nakatulog ug gidamgo kana? Dili, dili ako tulog niadto. Naglingkod ako nga nagsandig sa kahoy didto, nga nagabantay, og hapiton ko unta si Igsoong Woods ug si Igsoong Sothmann didto, nga hapit na, sa mga alas diyas sa buntag. Atua nagatrabaho ang mga mag-uuma, nga ginapangtipon ang ilang mga mais."

135 Ug nadungog ko Kadto pag-usab, nga nagaingon, "Nagapangayam ka man, ug nanginahanglan ka og pangayamnon. Pila man ang imong gikinahanglan?"

136 Ug nahunahunaan ko, "Karon, dili ko gustong pasobrahan kini, mohangyo lang ako og tulo, tulo ka mga squirrel. Gusto ko kanang bata pa, nga tulo ka pulahon nga mga squirrel. Kana ang gusto ko."

137 Miingon Siya, "Kung ingon niana isulti mo kini."

138 Ug misulti ako, "Makakuha ako og tulo ka mga bata pa nga pulahong mga squirrel."

139 Miingon Siya, "Asa man sila dapit magagikan?"

140 "Bueno," nahunahuna ko, "Midangat na ako niining puntoha, nga Adunay nagapakigsulti dinhi kanako." Sama lang nga madungog ninyo akong nagapakigsulti. Ug ang Dios nga anaa sa Langit, uban niining Biblia nga gipasandig ko sa akong dughan, nahibalo nga kana matuod. Ug Siya. . . Ug ingon ko, "Bueno, . . ." Gipili ko ang usa ka dili-katooan nga lugar, usa ka daan nga nag-uga nang sanga nga nagabitay didto (mga singkuenta ka yarda, kon diin nakapuntirya ngadto ang akong riple).

141 Misulti ako, "Ang nahaunang usa maanaa mismo dinha," ug nagkaatua gayud siya.

¹⁴² Gilugod ko ang akong mga mata ug gitan-aw balik (minglingi ako), ug nahunahuna ko, “Dili ko mopusil sa usa ka panan-awon.” Busa gilantaw ko balik, ug atua gayud ang maong squirrel. Gibutangan ko og bala ang akong pusil, nga pinuntirya, ug makita ko ang itum niya nga mata, bata pa nga pulahong squirrel. Hunahuna ko, “Ako—ako . . . basin tulog lang ako, ako—momata ako taudtaod. Kita mo, nagadamgo lang ako bahin niini.” Bueno, mihupo ako, gipusil ko ang squirrel ug nahulog kini sa sanga. Hunahuna ko, “Bueno, wala ko makasiguro.” Hunahuna ko, “Bueno, adtoan ko kaha didto ug pangitaon kini?” Ug—ug milakaw ako paadto didto, ug atua kini nagbuy-od. Gipudyot ko kini ug miagas ang dugo gikan niini. Ang panan-awon dili magdugo, kabalo na mo. Busa gipudyot ko kini, ug usa kadto ka squirrel. Naminhod gyud ko og ayo, ang tibuok kong lawas.

¹⁴³ Ug gilantaw ko ang palibot, ingon ko, “Dios, Ikaw gayud kadto!” Miingon ko, “Salamat Kanimo, tungod niini. Karon, moadto ako didto ug . . .”

¹⁴⁴ Miingon Siya, “Apan imong *gisulti!* Nagaduhaduha ka ba sa kung unsay imong gisulti? Nag-ingon ka nga mokuha ka’g ‘tulo.’ Karon asa man ang sunod nga usa magagikan?”

¹⁴⁵ Hunahuna ko, “Bueno, kung nagadamgo man ako, gusto kong ipadayon.”

¹⁴⁶ Busa ako—miingon ako . . . mipili ako og usa ka daan na nga troso didto, sa usa ka kahoy nga bug-os nalikusan sa niining makahihilong tubli. Wala ka gayu’y makuha dinha nga squirrel. Busa misulti ako, “Ang sunod nga usa magagikan mismo nianang makahihilong tubli,” ug atua nakapahimutang ang kadtong bata pa nga pulahong squirrel nga diretsong nagalantaw kanako. Paubos kong giplastar ang akong pusil, ug gilugod ang akong mga mata. Gitan-aw ko pag-usab, nahunahunaan ko . . . Atua siya nga nakatungtong, patakilid nga nakalingi ang iyang ulo. Gipusil ko ang maong squirrel, ug naghinayhinay na ako dayon pauli.

¹⁴⁷ Apan miingon, “Ang ingon mo ‘tulo’! Ginaduhaduhaan mo ba kung unsay imong gisulti?”

¹⁴⁸ Ingon ko, “Wala, Ginoo, wala ko ginaduhaduhaan kung unsay akong gisulti, kay Imo man ginapamatud-an.”

Kini ang usa ka Kasulatan nga nagpahunahuna gayud kanako: “Dili nga kung *Akong* isulti, kondili nga kung *inyong* isulti.” Dili nga kung gisulti kini ni *Jesus*, kondili nga kung *myo* mismong isulti kini.

¹⁴⁹ Ug nahunahunaan ko, “Siguro bisan pa man nakasulod na gayud ako niana nga alagian, ug nahibalo ako nga ania Siya dinhi tungod kay halos nga wala na ako sa akong kaugalingon.” Hunahuna ko, “Himoon ko kining usa ka dili-katoohan, nga medyo tininuod.”

Misulti ako, “Magkaaduna og usa, pulahon nga squirrel nga mokanaug gikan *nianang* bungtod, moagi mismo *niining* direksyon, ug nga tapad mismo kanako, ug moadto didto, ug mopahiluna *nianang* sanga, ug didto molantaw *nianang* mag-uuma.” Ania siya dayon nagapanaug sa maong bungtod, miadto mismo didto, ug mipahiluna, nga milantaw niadtong mag-uuma. Ug gipusil ko siya.

¹⁵⁰ Miingon si Satanas kanako, “Kabalo ka ba kung unsa? Puno man ang mga kakahoyan kanila, sa karon.” Ug atua ako didto hangtud sa alas dose, ug wala na’y uban pang butang nga nahitabo. Ginapakita niini nga sa diha ang Dios. . . Siya mismo ang Magbubuhat sa mga Langit ug yuta!

¹⁵¹ Adunay nagapaminaw, sa Jeffersonville karon, adunay usa ka pamilya nga gihinganlang Wright. Si Igsoong Woods ug ako nakaadto na aron bisitahon sila. Sila ang nagahimo sa bino nga pang-komunyon para sa iglesia. Atua naglingkod sulod sa lawak si makaluluoy’ng Edith; usa ka makaluluoy’ng babaye nga bakol, nga sukad-sukad siya’y masakiton na sa tibuok niyang kinabuhi, ug busa dugay na kaming nagpaabot nga ayohon siya sa Dios. Ang igsoon niyang babaye, nga usa na ka bala, namatay na ang iyang bana; Hattie ang iyang ngalan, mapainubsanon kaayo nga babaye. Ug samtang nga milakaw kami ni Igsoong Banks aron mangdakup og rabbit para kaniya, nagluto sila og usa ka dakung panghinam-is nga cherry; ug gipalingkod ako ug gipakaon.

¹⁵² Naglingkod kaming tanan niadto palibot sa lamesa, nga naestoryahan namo ang bahin niini, pipila pa lang ka adlaw niadto nga nahitabo kini. Ug samtang nga naglingkod palibot sa lamesa, nga ginaestoryahan ang bahin niini, sa kalit na lang miingon ako, “Unsa kaha ang posibleng nahitabo?” Ingon ko, “Igsoong Wright, usa ka na ka tigulang nga tawo, nga nangayam og mga squirrel sa tibuok mong kinabuhi. Igsoong Shelby, usa ka ka hanas na nga mangangayam. Igsoong Woods, mao pud ka. Nangayam na ako sa mga niini sukad pa sa akong pagkabata. Nakakita na ba gayud mo og squirrel didto sa sikamoro ug sa kalibunan sa locust?”

¹⁵³ “Wala, sir.”

¹⁵⁴ Ingon ko, “Dili gyud sila maanaa dinha.” Ingon ko, “Ang nahibaloan ko lang, mao gayud Kadto ang mao ra nga Dios. Sa nanginahanglan si Abraham og lakeng carnero, Siya mao ang *Jehovah-jireh*, mahimo Niyang ‘magtagana alang Kaniya Mismo.’” Ingon ko, “Nagtoo kong mao ra kini nga butang.”

¹⁵⁵ Ug ang makaluluoy’ng si Hattie nga naglingkod didto, miingon, “Igsoong Branham, kana wala’y lain kondili ang Kamatuoran!”

¹⁵⁶ Gisulti niya ang hustong pulong! Pagkasulti niya niadto, miabot na usab ang Balaang Espiritu niadtong alagian, nabati Kadto sa matag usa kanila. Mitindog ako, og misulti ako,

“Igsoong Hattie, MAO KINI ANG GINAINGON SA GINOO, husto nga pulong ang gisulti mo sama sa gisulti sa maong Sirofenisiahanon nga babaye. Nagasulti kanako karon ang Balaang Espiritu, ug nag-ingon kanako nga igahatag kanimo ang pangandoy sa imong kasingkasing.” Ingon ko, “Karon, kung ako alagad man sa Dios, kung mao man, matuman kini. Kung dili ako alagad sa Dios, kung ingon-ana bakakon ako, ug dili kini mamatuman, maglilimbong ako.” Ingon ko, “Karon sulayi ug tan-awa, kung Espiritu ba kini sa Dios o dili.”

¹⁵⁷ Miingon siya, “Igsoong Branham,” (nanghilak na ang tanan), miingon, “unsa ma’y akong pangayoon?”

¹⁵⁸ Ingon ko, “Aduna ka’y usa ka bakol nga igsoong babaye nga nagalingkod didto.”

¹⁵⁹ Aduna ko niadto og baynte dolyares sa akong bulsa, aron ihatag kaniya, nga iyang gibutang sa donasyon. Dili mokita ang maong babaye og mga duha ka gatus ka dolyares matag tuig, sa nianang gamay’ng, daan na og, kabus nga umahan, siya ug ang iyang duha ka anak nga lalaki. Ang maong mga anak niya nahimo nang mga kasagarang ‘Ricky,’ pagmay klase, kabalo na mo, ug motubag-tubag na gayud sa ilang inahan; ug mga kinse, dise-sais ang panuigon. Ug, oh, nagatindog sila didto nga nangatawa sa kung unsay akong ginaingon.

¹⁶⁰ Ug ingon ko, “Aduna ka’y amahan ug inahan nga nagalingkod dinhi nga mga tigulang na. Wala ka pa’y kwarta. Paghangyo og kwarta, ug tan-awon kung moabot kini sa imong sabakan. Paghangyo para sa imong igsoong babaye, ug tan-awon kung dili ba siya motindog ug molakaw.” Nahibalo ako dayon, sama ni Job, nga aduna gyu’y butang nga mahibaloan mo pagma-igo mo kini. Miingon, “Nahibalo ako! Ania ako nga nagatindog sa atubangan sa mga napulo ka tawo,” Ingon ko, “kung dili kini matuman, usa ako ka mini nga propeta kung ingon-ana.”

¹⁶¹ Miingon, “Unsa ma’y akong pangayoon?”

¹⁶² Ingon ko, “Anaa na kini kanimo ang paghimo sa imong desisyon. Dili ako ang makahimo og desisyon alang kanimo.”

¹⁶³ Milantaw siya sa palibot, ang maong gamay’ng babaye. Ug sa dihadiha dayon, miingon siya, “Igsoong Branham, ang pinakadakung pangandoy sa akong kasingkasing mao ang kaluwasan sa akong duha ka mga anak nga lalaki.”

¹⁶⁴ Misulti ako, “Ginahatag ko kanimo ang imong mga anak nga lalaki, sa Ngalan ni Jesus Cristo.” Ug ang maong mga nanggiagik-ik, nanggingisi-ngisi, nga nangginalawgaw nga mga bata ninghapa sa sabakan sa ilang inahan, ug misurender sa ilang kinabuhi ngadto sa Dios, ug napuno sa Espiritu Santo niadto mismong tungora.

165 Ngano man? Kana ang Kamatuoran! Adunay kagahum ang Dios nga patyon ako, sa atubangan niining mga tawo sa tibuok nasud. Daghan kaninyo nga ania dinhi ug nga anaa sa Jeffersonville, madungog ko nga nagasinggit sa tabernakulo karon og, “Amen!” tungod kay nanaglingkod mismo sila didto nga nagapaminaw niini, Kita n’yo, tungod kay Kamatuoran kini! Unsa man gayud kini? Kini sa dihang ang Dios, pinaagi sa Iyang hataas uyamot nga grasya; nagakahitabo kini! Gawas dinha, dili kini mahitabo.

166 Sa nianang labing hinungdanon nga higayon... Mahunahunaan ko ang mga kalalaken-an ug ang mga tawong kaila ko. Ang Dios nga ginalabyan ang tanan nga mga bantugan’g tawo, ug tanan na, aron mapaboran ang usa ka kabus, gamay’ng mapainubsanon nga babaye, nga halos dili makasulat sa kaugalingon niyang ngalan; ug nasayod Siya kadto kung unsa’y iyang pangayoon. Ug kadto ang pinakamahinungdanong butang; tungod kay patay na sa karon ang igsoon niyang babaye, ug siguradong mamatay ang iyang inahan ug amahan, siguradong nahurot na ang kwarta, apan Walay-Katapusan ang kalag sa iyang mga anak! Ug mao kadto ang takna alang kanila nga makuha Kadto. Ug dihadiha dayon pagkasulti ko’g, “Ginahatag ko kanimo ang imong mga anak, sa Ngalan ni Jesus Cristo,” didto nanghapa sila sa sabakan sa ilang inahan. Pila man ang ania dinhi nga nahibalo nga mao kana ang Kamatuoran, nahibalo ba kamo niini? [Nagaingon ang kongregasyon, “Amen.”—Ed.] Kita n’yo? Husto kana. Oo. Ngano man? Ang pagdihog!

167 Karon: “Nakadungog ako mahitungod Kanimo, nga Ikaw makabuhat og mga squirrel; nakadungog ako mahitungod Kanimo, nga Ikaw makabuhat og lakeng karnero; apan karon nakita ko Ikaw, pinaagi sa kaugalingon kong mata!” Ang kapadayagan, ang panan-awon nga nahimo nang makita. Pagnagsaad ang Dios sa bisan unsa man, mao na kana kung unsay Iyang pagabuhaton.

168 Himatikdi, pag-aduna ka’y panginahanglanon, nga mahimong sama kang Josue. Aduna siya niadto og panginahanglanon; wala niya hunahunaa ang mga panghitabo, gilitok niya kadto, ug mao na kadto ang Dios! Nagatoo ba kamo nga mihunong ang adlaw? Mao pud ko. Giunsa man niini pagbuhat kadto? Ayaw na paninguhaang sabton kadto, apan nahitabo gayud kadto. Nabuhat kadto ni Josue, ug gibayaw niya ang iyang mga kamot; sa niadtong makuyaw nga higayon aduna siya’y koneksyon ngadto sa Dios, ug mao kadto kung unsay nahitabo. Napanahon gayud kadto. Nakita sa Espiritu sa Buhing Dios ang panginahanglan niadto, ug miaghat kang Josue nga isulti kadto. Nakita sa mao ra nga Dios ang panginahanglan ni Abraham. Nakita sa mao ra nga Dios ang panginahanglanon nga pamatud-an kanako kini nga Kasulatan, nga kana nga

Kasulatan matuod, usab! Nakita sa mao ra nga Dios ang panginahanglanon niadtong duha ka mga pinili na daan nga mga batang lalaki, ug sa niadtong higayona nga gipamatud-an Niya kini ug nga gipanghimatud-an ang Iyang Pulong.

¹⁶⁹ Sa San Marcos 14, makita nato nga mitoo Kaniya ang usa ka babaye, aduna siya niadto og panginahanglan ug nakita nga gikinahanglan Niyang mahugasan ang Iyang mga tiil, gikinahanglan lang sa maong babaye nga madihogan aron makapanglihok. Karon paminaw og ayo...sa dili pa kita magtapos. Gikinahanglan lang niyang madihogan aron makapanglihok, tungod kay nakadungog na siya daan mahitungod Kaniya. Nadungog niya nga “Gipasaylo Niya ang usa ka babaye bahin sa mga kasal-anan niini, nga usa ka bigaon. Ug nga nag-ingon, ‘Kinsa man kaninyo ang wala’y sala? Maoy magbato sa unang bato.’” Nakadungog na siya mahitungod Kaniya, apan karon iya na Siyang nakita. Gidihogan siya aron alagaran Siya. Mao lang kana ang butang nga kinahanglan mahitabo kanimo.

¹⁷⁰ Tugotan nga isulti sa Balaang Espiritu kanimo nga “Usa ikaw ka makasasala!” Tugotan nga isulti kanimo sa Balaang Espiritu nga “Sayup ka!” Tugotan nga pamatud-an sa Balaang Espiritu kanimo pinaagi sa mga Kasulatan nga “Sayup ka sumala sa Kasulatan!” Ug unsay. . . tungod kay magaagi lamang Kini sa usa ka tul-id nga alagian sa matag Kasulatan sa Dios, dili Kini molaktaw alang sa kung unsa man. Kung buhaton mo man, wala gyu’y mahimong bisan unsa man nga kaayohan Kini kanimo. Tungod kay mahimong dihogan ka Niini sa Balaang Espiritu, apan kung ang maong kalag dili matarung alang sa Dios, sama sa nahisgotan na nato sa tibuok niining semanaha, dili sa gihapon maayo. Hinumdumi, manungha ang mga mini nga dinihogan sa kaulahiing mga adlaw; dili nga mini nga mga Jesus, mini nga mga cristo (mga dinihogan), ug manglimbong sa mga Pinili mismo kung mahimo pa.

¹⁷¹ Himatikdi, aduna ang maong babaye og usa ka pagpangalagad nga buhaton alang Kaniya. Nakadungog na siya mahitungod Kaniya, karon iya Siyang nakita sa iyang mga mata. Aduna siya’y pagpangalagad nga pagabuhaton, ug wala gayud siya’y bisan unsa man aron buhaton kini. Busa nagdalidali siya sa pag-adto didto sa gihapon, aron buhaton ang maong pagpangalagad, naghatag ang Dios og tubig ug mga tualya sa paghugas sa Iyang mga tiil. Nakadungog siya mahitungod sa usa ka Buhi nga Dios, sa tibuok niyang kinabuhi, apan karon nakita na niya Siya sa iyang mga mata. Naila niya nga Siya kadto, ug miabot kaniya ang pagdihog, ug miingon, “*Kini* na ang maong Mensahero!” Nanginahanglan Siya og pagpangalagad (wala ang maong babaye og bisan unsa man nga magamit aron alagaran Siya), mahugaw niadto ang Iyang mga tiil. Apan dalidali siya nga

miduol sa gihapon, aron alagaran Siya, tungod kay gidihogan siya aron buhaton kini.

¹⁷² O miyembro sa iglesia nga mibalik sa kadautan, maki-denominasyon nga lalaki ug babaye, dili ba ninyo makita ang panginahanglan nga aduna si Jesus niining gabhiona? Kung mahimo mang moabot ang dihog diha kaninyo, kini na ang maong takna sa pagbuhat niini. Apan iya Siyang nakita sa iyang mga mata. Ang uban pa gani ginabiaybiayan Siya niadto. Wala sila mitoo sa Iyang Mensahe. Sa tinuod, ang maong magdadapit, ang magdadapit nga pastor, si Simon, gidapit Siya sa pag-adto didto aron himoon Siyang kataw-anan. Wala sila mitoo nga usa Siya ka propeta.

¹⁷³ Busa sa diha dayon nga daw sa nahimo na kini sa Yawa og igoigo gayud alang kaniya nga masulti kini, nag-ingon siya sa iyang kaugalingon, “Kung usa pa ka propeta kining tawhana, nahibalo unta siya kung unsa nga matang sa babaye ang anaa sa iyang mga tiil. Kung usa gayud siya ka propeta!” Kita n’yo, wala gani kadto napadayag ngadto kaniya kung kinsa Siya. Wala’y unsa man nga pagdihog ang mahimong moabot kaniya, tungod kay wala ma’y bisan unsa man diha nga maabotan. Apan miabot kini ngadto kaniya!

¹⁷⁴ Milahus sa iyang mga pagpanaway ang panan-aw sa maong babaye. Mitoo siya nga Siya gayud, kita n’yo, ang maong Pulong sa mga propeta. Naila niya nga mao na Kadto ang tanan nga mga Pulong sa mga propeta, nga napanghimatud-an diha Kaniya. Nakadungog siya nga atua Siya niadto sa yuta, apan karon makita na niya Siya. Bantayi kung unsay iyang gihimo. Nakita niya nga nahimong unod ang Pulong, ang Mesias, ang Emmanuel. Sa diha nga gipahungaw niya ang mga pagpitik sa iyang pagtoo (bahin sa kapadayagan kung Kinsa Siya niadto, sa maong panahon nga iyang gipuy-an, nga Siya kadto ang maong Cordero sa Dios alang sa ingon-anang mga makasasala sama kaniya), miadto siya aron alagaran ang Iyang mga panginahanglanon nga wala’y hingbangkaagan kung unsaon niya pagbuhat niini.

¹⁷⁵ Sa ingon nianang paagi nga nagaabot ang tinuod nga pagpang-ayo, sa dihang nahipadayag kanimo nga “Gisamaran Siya tungod sa imong mga kalapasan, napangos tungod sa imong mga kasal-anan, ug pinaagi sa Iyang mga labod *ikaw* naayo.” Pagnaidihog kini kanimo aron makita ang Iyang Presensiya dinhi, sa San Marcos 11...o San Lucas 17:30, nga Iyang igapadayag ang Iyang Kaugalingon sa kaulahiing mga adlaw (sa taliwala sa Iyang mga tawo, diha sa tawhanong lawas) sama sa Iyang gibuhat sa una sa Sodoma. Pag-nakita mo kana, ug adunay butang nga miabot kanimo!

¹⁷⁶ Mahimong moingon ang doktor, “Anaa pa dinha ang kanser.”

177 Mahimo nga moingon ang pasyente, “Ako—ako—ako—ako—ako—dili ko kabalo kung unsaon ko paglakaw, apan makalakaw gayud ako sa gihapon.” Wala kita mahibalo kung unsaon niini pagbuhat.

178 Miadto siya aron nga alagaran Siya, tungod nga miabot ang pagdihog Kaniya . . . miabot sa maong babaye, nga kadto na ang maong takna, mao na kadto ang Mensahero, mao na kadto ang Mesias nga mao ang moayo, ug gitooan niya Kini. Ug nanginahanglan Siya og usa ka pagpangalagad nga buhaton ngadto Kaniya, ug miadto siya nga wala’y dala nga bisan unsa man nga mopakita nga mahimo niyang buhaton kini. Miadto lang siya basi sa pagkadihog kaniya. Bantayi! Giablihan sa Dios ang tuboran sa mga glandula sa iyang luha sa iyang mga mata. Ang mao rang mga mata nga nakadungog . . . mga igdulongog nga nakadungog na Kaniya; ang mga mata nga nakakita na Niini, mingluha sa kalipay. Dayon ang kadtong usa pa, ang gikahatag sa Dios nga taas nga buhak, nga inubanan niadtong mga luha nga nagaagas. Naghatag ang Dios kaniya og mga tualya (pinaagi sa iyang buhok), ug inubanan sa iyang mga luha. Napangalagaran niya ang Iyang mga panginahanglanon, ang panginahanglanon sa Buhing Dios. Nakadungog siya mahitungod Niini, apan karon nakita na niya Siya, makapangalagad na siya Kaniya.

179 O makasasala! Nganong dili man nimo buhaton ang mao sa gihapon sa diha nga makita mo ang maong mga panginahanglanon karon? Nga gikinahanglan ka Niya, ang imong pagpangalagad! Karon nakita mo na ang Usa, Kinsa Mao’y imong nadungog sa Biblia. Ato Siyang nakita nga miabot kagabii dinhi, ug kung unsa ang Iyang gibuhat. Makita nato Siya, sa kada panagtigum, ug usahay manglingkod lang kita nga ingon ka bugnaw ug nga walay pagpakabana, moingon, “Oo, nasayod ako nga ginasulti kini sa Kasulatan. Oh, akong—nakita ko nang nangahimo kini, kita mo.” Wala kita’y kadasig, daw sa wala kini mismo nagaabot kanato. Mora og wala’y butang diha, sama sa daw sa nagabubo ka og . . .

180 Mokuha ka og pusporo ug kadliton kini, kung ang pusporo walay sulfur sa ulo sa maong palito, dili kini mosiga. Ug mahimo mong kadliton ug kadliton ug kadliton, apan kung adunay kemikal dinha nga mipatay sa sulfur, dili kini mosiga, wala gyu’y mosiga. Apan kung kanang kemikal, ang sulfur nga ginakadlit sa metal . . . anaa pa dinha sa pagkadlit niini, mosiga kini.

181 Ug sa dihang ang matuod, tinuod nga pagpanghimatuod sa Kasulatan sa niining Mensahe sa kaulahiing adlaw, ug nga makita mo ang Presensiya ni Jesus Cristo, nga imo nang nadungog kung unsay Iyang gihimo sa Iyang kinabuhi, ug nga madungog ang Kasulatan nga nagaingon “Siya mao sa gihapon kagahapon, karon ug hangtud sa kahangturan”; ug nga sa dili pa gayud ang Sodomahong kahimtang pagasunogon sa kapungot

sa Dios, makita si Jesus nga nagabalik sa taliwala sa Iyang mga katawhan, nga naporma sa tawhanong lawas, ug ginabuhat ang samang butang nga Iyang gipamuhat niadto. Sus! Angay kining mopasiga sa atong mga kalag ngadto sa Kahimayaan! Angay kining mamuhat kanato og usa ka butang. Ngano man? Nagaabot na kini dinha.

¹⁸² Nadungog na ninyo sa Biblia kung unsay Iyang gipamuhat, kung giunsa sa babaye paghikap sa Iyang bisti. Milingi Siya ug gisultihan siya kung unsay iyang problema, ug giayo siya sa iyang pagtoo. Karon, nagsaad Siya nga pagabuhaton Niya pag-usab ang mao rang butang, sa dili pa sunogon ang kalibutan, ug ang kalibutan mapaingon sa usa ka Sodomahong kahimtang. Ang maong Bag-ong Tugon, ang Propeta, ang Dios nga Propeta, ang Propeta sa mga propeta, ang Dios sa tanang mga propeta, ang kahupnganan sa Pagka-Dios diha sa pagkalawas, ang Dios nga . . . nadayag sa unod, ang Magbubuhat, sa Genesis. Alleluyah! Kini ang Iyang Pulong! Nag-ingon Siya nga mahitabo kini! Ug makita na nato ang Sodoma nga kahimtang, makita na nato ang kalibutan sa niana nga kahimtang, karon makita nato Siyang nagapanaug ug nga eksaktong ginabuhat kung unsay giingon Niya nga Iyang pagabuhaton. Karon, nakadungog na kita mahitungod Kaniya, karon makita na nato Siya! “Nakadungog ako mahitungod Kanimong pinaagi sa akong mga igdulog, karon makita ko Ikaw sa akong mga mata.” Amen! “Makita ko Siya sa kaugalingong kong mga mata.” Pagkamahinungdanon gayud kini nga takna! Pagkamahinungdanon gayud kini nga panahon! Ang pagpamatud sa Iyang Pulong! Kanunay sa dihang ginapamatud-an ang Pulong, kana ang Dios nga nagasulti diha sa Iyang Pulong, ginahimong makita ang Iyang Kaugalingon aron nga inyong makita.

¹⁸³ Karon, ania ang usa ka gamay'ng bigaon nga gikan pa sa kalye, mihapa siya sa altar, sa atubangan ni Jesus, ug ang Iyang mga tiil gihugasan sa maong babaye pinaagi sa—pinaagi og mga luha, ug—ug gipahiran kini sa iyang buhok. Gidawat sa Dios, miingon Siya, “Bisan asa man igawali kining Maayong Balita, tugotan kining isugilon gayud alang sa iyang handomanan.” Ngano man? Tan-awa kung unsa siya niadto ka hugaw, apan may miigo nga butang. Nakita niya ang Pulong sa saad, gikan didto sa Tanaman sa Eden, kining, “pagadugmokon sa Binhi sa babaye ang ulo sa bitin.” Nakita niya ang Mesias nga natawo sa usa ka ulay.

¹⁸⁴ Nadungog niya nga matawo Siya sa usa ka ulay, apan nadungog nila nga ang kanang lalaki anaa sa yuta. Nadungog niya nga adunay usa ka rabbi, nga Propeta, nga nang-ayo sa mga may sakit. Gitooan niya kana! Ug ania na siya nga gikan sa dalan, nga nagalakaw-lakaw, nga nagalantaw-lantaw sa palibot. Ug milantaw siya didtong dapita ug nakita kadtong

nagapadayon nga salosalo. Milusot siya sa koral, ug milili, ug atua gayud Siya. Atua gayud Siya! May sa kung Unsang Butang nga nag-ingon, “Siya kana!” Kita n’yo, mao lang kana ang gikinahanglan niya aron madihogan. Nakita n’yo kung unsay nahitabo? Nakita niyang nahimong unod ang Pulong sa Dios. Nakadungog siya pinaagi sa iyang igdulongog, karon nakita niya pinaagi sa iyang mga mata.

¹⁸⁵ Karon, ang tanan nasayod nga aduna kita’y saad mahitungod sa kahimtang sa iglesia, sa ulahing mga adlaw. Ang iglesia, sa karon nga kahimtang niini, dili gayud makahimo sa pagtuman sa mga sugo sa Dios, sa dakung sugo, dili gayud makahimo sa pagtawag sa Pangasaw-onon pagawas. Hain man ang makahimo niini? Ang mga Pentecostal ba? Moingon ko nga dili. Wala ni usa man kanila. Mao kana ang tipaka sa trigo. Nga mitungha, nga eksaktong mora gayud og sama sa trigo, apan wala ma’y trigo diha niini. Moabli kini, apan nagagawas gikan dinha ang lugas. Moorganisa sila, ilang ginapatay ang ilang kaugalingon. Dinha sila nagakamatay. Sila ang mga lindog. Apan miagi dinha ang trigo, ug karon nagasugod na kini’g porma diha sa pagka Pangasaw-onon nga porma. Ang maong lugas sa trigo nga nahulog ngadto sa yuta niadtong mangiub nga kapanahonan, kinahanglan nga mamatay kini.

¹⁸⁶ Kadtong kritiko nga nagaingon, “Ngano man ang usa ka Dios sa kaluoy, nga mahimong pabukaon ang Dagat nga Mapula, maagwanta nga mapasagdan kadtong makaluluoy’ng mga Cristohanon nga makaon sa mga liyon, ug mangasunog, ug tanan na? Makapahimutang pa, nga sama sa daw nagpahiyum pa Siya bahin niini!” Ang maong makaluluoy og walay-hingbangkaagan! Wala ba siya nakahibalo, “Gawas nga mahulog sa yuta ang usa ka lugas sa trigo”? Gikinahanglan nga mamatay kini niadtong mangiub nga mga kapanahonan, sama sa uban pang lugas sa trigo nga gikinahanglan matabonan sa yuta ug malubong, aron mogitib sa unang repormasyon kadtong duha ka mga dahon ni Luther, ang lindog. Gikinahanglan nga motungha kini sa panahon sa mga Wesleyan, didto, aron ipagawas ang polen, ang mga uhay, ang dakung kapanahonan sa pagpang-misyon. Gikinahanglan nga motungha diha sa Pentecostal, alang sa pagpanag-uli sa mga gasa, nga halos limbongan na ang Pinili mismo. Mora og usa na ka lugas sa trigo; pag-abli niini, wala man lang og trigo dinha, tipaka lamang kini. Apan didto na, dayon, misugod sila pagporma sa organisasyon sa oneness, sa organisasyon sa trinity, sa organisasyon sa twoness, sa organisasyon sa church of God, ug sa pagkaorganisa na sa tanan, ug eksaktong kamatayon na gayud! Ug karon unsa na’y nagakahitabo? Apan usa kini ka silonganan para sa lugas sa trigo, nagsige kini’g tubo sa tanang panahon.

¹⁸⁷ Karon nagsugod na kini pagbuka, hinayhinay nang makita ang lugas. Dili na kini ang kapanahonan sa Pentecostal.

Kini na ang kapanahonan sa kaulahiang adlaw. Kini na ang kapanahonan sa Pangasaw-onon. Kini na ang Kahayag sa kagabhion. Kini maoy kon kanus-a nga kinahanglan nang matuman ang Malaquias 4, aron masunod ang plano sa Dios. Kini ang Lucas 17:30, nga mamatuman na. Kini ang ikaduhang . . . Ug si Jeremias, ug ang tanan nang uban pa kanila, nga gipanghisgotan ni Joel sa niining mga adlaw, *kini* na ang kanang adlaw. “Nakadungog ako, Ginoo, ug nga nagasingabot Kini, apan karon akong nakita Kini sa akong mata.”

¹⁸⁸ Bisan pa nga daghang . . . unsa pa man ka daghan ang manungsa nga mini nga mga manunundog, kadtong si Jannes ug si Jambres inubanan sa tanan nilang mga panglingla aron sa pagbuhat sa tanan nga gibuhat ni Moises, wala man lang gayud nakapatay-og kaniya o kang Aaron. Nasayod sila kung asa . . . nga sama ni Job, nasayod sila kung Kinsa nagagikan ang ilang dihog. Nasayod sila nga Kadto ang MAO KINI ANG GINAINGON SA GINOO! Ug ang mao rang Biblia nga naghisgot mahitungod kanila, miingon, “Manungha sila sa kaulahiang mga adlaw, ang mga manunundog.” Kadtong relihiyosong mga denominasyon, sa dihang adunay misugod nga butang . . . Kinsa ma’y nagsugod una? Si Moises ba o sila? Kung sila ang unang misugod, si Moises na unta ang—manunundog.

¹⁸⁹ Karon aduna na kita og tanang matang sa mga magtutugkad ug tanan nang uban pa nga nagapaninguha nga ipahilayo ang inyong hunahuna gikan sa tinuod nga butang sa Dios, nga gipamatud-an na sa Dios nga mao ang Kamatuoran pinaagi sa Iyang Kasulatan. “Nakadungog kami mahitungod Niini pinaagi sa among mga igdulog, karon nakita namo Kini sa among mata.” Amen! Nagatoo ba kamo Niini? [Nagaingon ang kongregasyon, “Amen.”—Ed.] Sa tibuok natong kasingkasing! Ang pagdihog! Ug sa nianang adlaw sa dihang ginapadayag na ang Anak sa tawo, usa ka Anak sa tawo, si Jesus Cristo nga nahipadayag sa taliwala sa Iyang mga katawhan.

¹⁹⁰ Usa ka lalaki ang miadto didto sa atubangan ni Abraham ug sa iyang grupo, usa ka Lalaki nga ordinaryo lang kon tan-awon, nga may mga abog ang Iyang bisti. Nga nakatalikod Siya sa balongbalong, nag-ingon Siya, “Asa man ang imong asawa nga si Sarah?” (dili nga S-a-r-r-a, S-a-r-a-h; A-b-r-a-h-a-m, dili A-b-r-a-m). Gitawag ang iyang ngalan, miingon, “Asa man siya?”

¹⁹¹ Mitubag, “Anaa siya sulod sa balongbalong, sa Imong likod.”

¹⁹² Miingon, “Pagaduawon Ko ikaw sumala sa panahon sa kinabuhi” (ug pahilum nga mikatawa ang maong babaye). Miingon, “Nganong mikatawa man siya?” (uh-huh). Karon, nagsaad Siya. Kadto ang maong mga tawo nga nagahulat alang sa usa ka gisaad nga anak nga lalaki.

¹⁹³ Karon, dili mahinungdanon kanako kung unsa ma’y ginapamuhat sa mga tawo sa niining mga denominasyon,

nga sila kuno “nagapaabot kang Cristo,” ang ilang mga lihoc nagapamatuod nga wala sila nagapaabot. Husto kana. Mas kusog nga nagasulti ang inyong mga lihoc kay sa inyong mga pulong. Ang ila lang ginahunahuna mao ang pagpadaghan og mga pang-denominasyon nga miyembro, apan adunay uban nga mga tawo, usa *dinhi* ug *didto*, nga nagapaabot alang sa Pag-abot sa Ginoo. Nagabantay sila alang sa . . . bisan pa man. Ang kadto lamang nga Iyang padaygan sa Iyang Kaugalingon, kadto lamang ang makasabot.

¹⁹⁴ Ang Pinili lang gayud ang makasabot kung Kinsa Siya. Hunahunaa lang, aduna siguro niadto mga tulo ka milyon ka mga tawo, mga Judio, sa yuta, nga ang katulohon kanila wala pa nasayod nga atua Siya didto hangtud nga nahuman na Siyang miabot ug mibiya na. Kita n’yo? Apan nagpadayag Siya sa Iyang Kaugalingon ngadto kanilang mga nanaghulat: Si Juan nga Bautista, ug—ug ang nanagsunod nga mga tinawag ni Juan, ug uban pa, ug si Anna nga buta didto sa templo, si Simeon nga sacerdote nga “gipadayag niadto kaniya sa Espiritu Santo nga makita niya gayud ang Cristo.” Ang tanan kadtong bantugan nga relihiyosong mga lider, mga teologo ug mga ingon-ana, pagkabuta gayud nila!

¹⁹⁵ Ang ulan lamang ang makapatubo sa Binhi, kung anaa na daan ang binhi dinha. Ug ingon nga usa ka pa ka binhi niadto sa imong amahan, ug wala pa siya nakaila kanimo, apan atua ka na daan sa imong amahan. Apan pinaagi sa usa ka binhianang yuta sa imong inahan, nahipadayag ka sa imong porma, ug dayon makapakig-estorya na siya kanimo. Ang Dios, ang Gamhanang Dios; kung aduna ka’y Kinabuhi nga Wala’y Katapusan, kung ingon-ana ang maong binhi sa Kinabuhi nga Wala’y Katapusan atua na sa Dios sa kinasugdanan. Ug atua ka na didto, atua ka na sa Iyang hunahuna, ang imong ngalan ug tanan na. Ug Siya, pinaagi og daang-pagkahibalo, gikatagana ka nang makita Kini. Ug kamo nga wala gikatagana, dili gayud makakita Niini. Apan, hinumdumi, sa Ngalan ni Ginoong Jesus, “Ania na ang maong takna!” Dili mo ba Siya toohan? Itugyan ang inyong mga kinabuhi ngadto Kaniya. Kinahanglan ko nang mohunong, lagpas na sa alas nuebe.

Iduko nato ang atong mga ulo.

¹⁹⁶ “Nakadungog ako, Ginoo, mahitungod Kanimo, karon nakita ko Ikaw!” Ginoong Jesus, panalangini kining mga tawo samtang nagapaabot sila.

¹⁹⁷ Karon gusto ko kamong pangutan-on og usa ka pangutana. Tugotan ko ang Balaang Espiritu (nagasalig ako nga buhaton Niya) nga susihon ang inyong mga hunahuna, nga susihon kamo, susihon ang inyong kalag, ug tan-awon kung nagatoo ba gayud kamo. Ug kung makita ninyo nga aduna og gamay’ng pagduhaduha dinha, mahimo bang itaas ang inyong

kamot? Moingon, “Ginoong Jesus, tugoti akong makita Ka. Nakadungog na ako mahitungod Kanimo, apan wala pa gayud ako nakakita Kanimo. Tugoti akong makita Ka, motoo ako.” Sige. Maayo kana.

¹⁹⁸ Aduna ba’y pipila dinhi nga wala pa nakaila Kaniya ingon nga imong Manluluwas? Ipataas ang imong kamot, moingon, “Kung . . . ako—usa ako ka makasasala, apan kung ako . . . kung Ikaw—kung matugotan Mo lang ako nga makita Ka, Ginoong Jesus, ipadayag kini nga Pulong nga ilang ginahisgotan. Nasayod ako nga ingon niana kung giunsa pagkakita ni Job Kanimo. Nasayod ako nga ingon niana kung giunsa pagkakita ni Abraham Kanimo. Nasayod ako nga sa ingon niana kung giunsa pagkakita Kanimo sa tanang uban pa kanila, tungod kay kadto mao ang Imong gisaad nga Pulong nga ginapanghimatud-an. Nadungog ko na ang tanan nang matang sa ingon-anang mga butang, ug mga panglingla, ug tanan na, apan nasabtan ko nga adunay usa ka pang-kaulahiang adlaw nga Mensahe sa yuta, nga gisulti sa Manulonda didto sa suba, sa 1933. Nadungog ko ang nagapadayon nga mga panerbisyo sa pagpang-ayo, ug nasayod ako nga sa dihang mahitabo kana, dili kini makapabilin nianang mao ra nga pang-denominasyong pamaagi.” Wala kini gipadala alang niana, wala gayud kini mipabilin dinha. [Blangko nga bahin sa teyp—Ed.] . . . ? . . .

¹⁹⁹ Unsa kaha kung miabot si Moises, miingon, “Magtukod kita og usa ka arka sama sa gibuhay ni Noe, og ipalutaw pagawas sa Egipto didto sa suba”? Oh, dili. Kita n’yo? Dili! Aduna siya’y Mensahe gikan sa Dios, nga siya ang kapadayagan. Kadtong propeta nga mitungha sa maong esena, igo na unta nga pagpamatuod ngadto sa Israel mismo didto. Wala sila nagkaaduna og usa ka propeta sa upat na ka gatus ka mga katuigan, wala sila nagkaaduna og usa ka propeta, ug ania ang usa ka propeta nga nagatungha sa maong esena. Nahibaloan na unta nila nga adunay butang nga magakahitabo.

²⁰⁰ Wala usab nagkaaduna og usa ka propeta ang Israel sa ginatus ka mga katuigan, ug ania miabot sa esena si Jesus. Ug ang babaye didto sa atabay, miingon, “Ginoo, nakita ko nga usa Ikaw ka propeta. Karon, wala pa kami nagkaaduna og usa sa upat na ka gatus ka tuig.” Tungod kay, nasayod Siya kung unsay sulod sa iyang kasingkasing. Kita n’yo?

²⁰¹ Karon, gikasaaran kita og kapanahonan sa iglesia pinaagi sa mga repormador, ug nagkaaduna kita kanila. Apan nagsaad Siya, sa Malaquias 4, nga tumanon Niya ang Iyang plano sa kaulahiang mga adlaw, sa kung unsay mahitabo, “Aron pabalikon ang mga kasingkasing sa mga anak ngadto sa Pagtoo sa apostolikanhong amahan.” Alang nianang mismong katuyoan! Ug ang iglesia nagkabuwag-buwag na gayud sa mga denominasyon ug mga ismo, nagkawatas-watas kini hangtud nga patay na kini; nga sukad pa usa kini ka tagdala. Ug

dayon gisaad Niya, nga sa panahon na sa Mensahe sa ikapitong manulonda, igapadayag ang Pito Ka Selyo; ug ang mga tinago sa Dios igapahayag na (Pinadayag 10) sa dihang nagasugod na pagtingog ang ikapitong manulonda sa iyang Mensahe, dili ang panerbisyo sa pagpang-ayo, ang Mensahe nga nagasunod sa maong panerbisyo sa pagpang-ayo.

²⁰² Si Jesus usa ka “maayo kaayong tawo” samtang nga nagapang-ayo pa Siya sa mga masakiton. Apan sa dihang miingon Siya, “Ako ug ang Akong Amahan Usa ra.”

²⁰³ “Huh-uh! Sayup kadto!”

²⁰⁴ Si Job “halangdon,” hangtud nga adunay nahitabo kaniya. Kita n’yo? Kanunay nang ingon niana kini.

²⁰⁵ Toohi ninyo! Inyo ba Siyang dawaton karon? Ipataas ang inyong kamot, moingon, “Nagatoo ako Kaniya. Gusto kong dawaton Siya.” Panalanginan ka sa Dios. Panalanginan ka sa Dios. Kana’y maayo.

Karon paglingkod lang nga hilum ug mag-ampo sa makadiyut.

²⁰⁶ Minahal nga Dios, sa niining maalampong higayon, nga mamahimong usa ka panahon sama niini sa dihang magkaaduna na gayud og usa ka paglagapak sa dalogdog sa umalabot nga adlaw, ug mokanaug na ang Anak sa tawo gikan sa kalangitan inubanan sa pagsinggit, inubanan sa tingog sa Punoan sa mga Manulonda, ug sa budyong sa Dios, nga mangabanhaw ang mga nangamatay diha kang Cristo. Ug nasayod ang matag usa kanamo ug nakamatngon karong gabhiona, Amahan, nga manubag gayud kami sa matag pulong nga among ginapahayag, ug sa matag pulong nga among ginasulti. Bisan pa ang mga panghunahuna nga anaa sulod sa among mga kasingkasing, manubag kami niini. Ginaampo ko Kanimo, Dios, sa Ngalan ni Jesus, nga Imong hugasan ang matag kasingkasing nga ania dinhi. Hugasi ang akong kasingkasing, hugasi ang mga kasingkasing niining mga tawo. Ug hinaut nga mahimo kaming andam, Ginoo, ug hinaut nga maablihan ang among espirituhanong mga mata karong gabhiona aron makita ang Himaya sa Dios nga Makagagahum sa Tanan. Nakadungog kami mahitungod Kaniya, O Amahan, nga Dios, nagaampo kami nga Imo kaming tugotan nga makita Siya. Itugot kini, Amahan. Itugot kining mga panalangin, nga akong ginaampo, pinaagi sa Ngalan ni Jesus Cristo. Amen.

²⁰⁷ Hinumdumi: Sa inyong kasingkasing, kon diin kamo nanglingkod, himoa ang inyong gamay’ng altar. Moingon, “Ginoong Jesus, pagsulod sa akong kasingkasing karon. Hatagi ako og butang nga...butang nga akong mahimong kuptan. Tugoti nga mabati ko kanang pagdihog nga nagaingon kanako nga Ikaw ‘ania karon.”

208 Karon, pagkamahinungdanon nga pahayag aron isulti ngadto sa mga tawo! Usa—usa ka mahinungdanon kaayong butang nga buhaton! Karon pagahangyoon ko ang Ginoong Dios, hangyoon nga . . .

209 Pila man kaninyo ang nagakuha og mga teyp? Nadungog na ninyo ang mahitungod sa: *Unsang Oras Na Ba Karon, Mga Sir?* Napakita ba namo kaninyo kadtong mga magasin ug ang ingon-anang mga butang, usa ka tuig bag-o kadto nahitabo? Dili matubag kadto sa siyensya. Atua ang Ginoong Jesus nga napurong-purongan ug nga nagasul-ob og puti nga peluka sama sa inyong makita diha sa Biblia, sa Pinadayag 1, ug sa Daniel, ang Labing Hataas nga Maghuhukom sa Langit ug yuta. Didto mismo, nga bisan ang siyensya mismo dili makakita Niini. Ug didto sa mga obserbatoryo, didto sa Unibersidad sa Arizona ug paingon sa Mexico, nangtuki sila, sukad pa niadtong nangaging duha ka tuig. Ug atua kini nga giingon na kaninyo, nga kadto “mahitabo gayud,” nga sa dili pa.

210 Unsa na man ang bahin sa linog sa Alaska? Bantayi ang pagkahugno sa Hollywood ngadto sa dagat! Bantayi ug makita ninyo kung dili ba kini mahitabo. Wala pa gayud Siya’y nasulti kanako nga sayup, mahitabo gayud kini. Kita n’yo? Ug bantayi lang ug makita ninyo kung dili ba kita nagapuyo sa nagahinapus na mga panahon sa kasaysayan. Wala’y tawong nasayod kung unsang taknaa Siya moabot. Apan nasayod ako sa usa ka butang: nagatoo ako, nga sa kahimtang ko sa karon, kung anaa man ako sa husto kong pangisip, ug kung dili pa ako usa ka Cristohanon, siguradong gustohon kong mamahimong usa ka tinuod og Biblianhong Cristohanon, dili usa ka pang-denominasyon. Ayaw pagsalig tungod nga nakasinggit ka. Nadungog na nato kana kaganinang buntag, nga gipamatud-an kini pinaagi sa Pulong sa Dios; nga bug-os kini nga wala sa kabubut-on sa Dios, wala’y nahimong butang kondili nahimong hinungdan sa kamatayon. Ayaw pagpahianha sa lindog, pagpahianha sa Kinabuhi. Kita n’yo? Magmaaduna og pagtoo sa Dios.

211 Nagatoo ba kamo nga ang Dios nga naghimo niining saad, nga nagpakita Siya Mismo, diha sa Basahon sa Genesis, ug nagpakita kang Abraham ug nga gihimo kadto nga milagro . . . Kanang mao ra nga Dios nahimong unod, nga unod sa tawo, natawo sa usa ka ulay. Usa kadto ka theophany didto, siyempre, apan sa dihng miabot Siya diha sa unod sa tawo ug ang mao ra nga tawo, ug nga nagapamuhat sa mao gihapong mga butang . . . Wala ba kamo nagatoo nga kung makakuha ang Dios og usa ka tawo, nga gisaad na Niya nga buhaton sumala sa Malaquias 4, usa ka alagianan nga pinaagi niini makasulti Siya, pagabuhaton Niya ang samang butang nga giingon Niyang pagabuhaton Niya didto? Ginatoohan ba ninyo kana? Nagatoo akong buhaton Niya, usab.

212 Nagatoo ba kamo nga makabaton kamo sa maong pagtoo nga mahikap ang Iyang bisti, ang Iyaha nga pagtoo aron mahikap ang bisti? Nagatoo ba kamong mga ania karon nga adunay nagapakigsulti sa inyong kasingkasing nga nagaingon kaninyo nga aduna kamo’y pagtoo sa paghikap sa Iyang bisti? Nagatoo ba kamong mahimo n’yo kana? Kab-ota ninyo ug hikapa pinaagi sa inyong pagtoo kung ingon-ana, dili pinaagi sa emosyon, pinaagi lang gayud sa putli, walay sambog nga pagtoo. Moingon lang, “Ginoo, nagatoo ako. Nagatoo ako sa tibuok kong kasingkasing. Gusto ko nga Imo akong hikapon tungod kay akong—ako nang nadungog nga Imo nang nahimo kini, karon gusto kong makita kini sa kaugalingon kong mga mata.”

213 Ug dili ako makahikap kaninyo. Kinahanglan niini ang Dios nga maoy mobuhat sa maong paghikap. Nagatoo ba kamo nga Iyang pagabuhaton kini? [Nagaingon ang kongregasyon, “Amen.”—Ed.]

214 Nagalantaw ako sa wala ko nga bahin dinhi. Mora og adunay usa ka alagianan, nga medyo, nga samtang nagasulti ako, adunay nagabira pa-nianang direksyon. Ingon nga nahitudlo niini kanako sa nianang direksyon, makahibulong nga nagaabot kini karon. Usa ka babaye kini nga nagalingkod dinha kauban ang iyang bana. Dili siya taga-dinhi. Siya’y taga-Texas, sa Dallas. Siya’y nagaantus, ang iyang bana nagaantus usab. Nagaantus siya sa usa ka komplikasyon, nagkaaduna siya og usa ka operasyon. Husto kana. Ang iyang bana nagaantus sa usa ka butang tungod sa iyang likod, problema sa likod. Si Mr. ug si Mrs. Corbet, nga taga-Texas; Dallas, Texas. Kung tinuod kana, ipataas ang inyong kamot. Dili ako nga kaila ninyo. Husto ba kana? Wala ni unsa mang paagi sa kalibutan nga ako makahibalo niana. Unsa man kini? “Nakadungog ako mahitungod Kanimo pinaagi sa igdulongog, karon makita ko na Ikaw.” Nakita n’yo ba kung unsay akong pasabot? Karon pangutan-a ninyo kanang magtiayon. Wala pa gayud ako nakakita kanila sa tibuok kong kinabuhi. “Nakadungog ako mahitungod Kanimo pinaagi sa igdulongog, karon makita ko na Ikaw pinaagi sa akong mata.”

215 Kung mahimo mong toohan, mahimong ihatag sa Dios kung unsa man ang imong panginahanglan.

216 Kanang lalaki nga nagalingkod dinha nga nakahinuko, tungod nianang altapresyon. Nagatoo ka ba nga ayohon ka sa Dios, sir? Nagatoo ka ba? Naglingkod nga nakaingon *niini* ang imong kamot, nagatoo ka ba nga ayohon ka sa Dios sa nianang altapresyon? Itaas ang imong kamot, kung nagatoo ka Niini. Sige, ayohon Niya kini. Wala ko pa gayud nakita ang maong lalaki sa tibuok kong kinabuhi, wala ko’y unsa man nga nahibaloan bahin kaniya. Apan inyo nang nadungog nga si Jesus nag-ingon, dinhi sa Biblia, nga Iyang buhaton kining mga butanga, karon inyo nang makita kini! Nakita n’yo ba kung unsay akong pasabot? “Kung mahimo mong toohan, ang

tanang butang mahimo.” Ngadto lamang kanila nga nagatoo! Nagkinahanglan kini og tinuod, lunsay’ng pagtoo aron nga mahimo kini. Apan kon mahimo mong toohan Kini, itugot kini sa Ginoo.

217 Adunay usa ka babaye nga nagalingkod sa likod dinha, nga nagatan-aw kanako, may goiter siya sa iyang tutunlan.

218 Ang babaye nga naglingkod sa tapad, nga naglingkod sunod kaniya, aron nga masabtan niya, kana nga babaye dinha adunay altapresyon, usab. Husto kana.

219 Ang babayeng naglingkod tapad kaniya, siya adunay—adunay sakit, usab. Ug dili siya taga-dinhi, siya’y taga-Arkansas. Dili nila nakuha kini. Miss Phillips, tumoo ka kang Ginoong Jesus Cristo ug mamaayo ka na! Nagatoo ka ba Kaniya? Sa bug-os mo bang kasingkasing? Ginadawat mo ba Kini? Husto. Kung ingon-ana maangkon mo kini.

Karon moingon kamo, “Misterioso kana.” Dili! Dili!

220 Nag-ingon si Jesus, “Ang imong ngalan si Simon, anak ikaw ni Jonas.” Husto ba kana?

221 “Nakadungog ako mahitungod Kanimo pinaagi sa akong igdulongog, karon makita ko Ikaw sa akong mata.” Karon dili ba ninyo makita kung unsay nahitabo? Usa ka tawo nga naglingkod lang dinha, nga nagatan-aw, nga nagatoo, nga nagasalig, ug sa kalit lang dinha na nagakahitabo. Kita n’yo?

222 Maayo na ba ang imong ginabati, anak, karong gabhiona, kay sa kagabii? Nga nakapahimutang na? Maayo na kini karon, mamaayo ka na (uh-huh). Naglingkod dinhi kagabii, nga ginadusmog ang iyang ulo ug tanan na; karon, niining gabhiona, mora na siya og buutan nga tawo. Kita n’yo? Mora siya og medyo nagkalibog bahin sa mga butang, apan nahitul-id na kini tanan karon. Kita n’yo? Mamaayo na kini. Kita n’yo? “Ug nianang adlaw, igapadayag na ang Anak sa tawo, kita n’yo, sa dili pa gayud sunog ang Sodoma.”

223 “Nakadungog ako mahitungod Kanimo pinaagi sa akong igdulongog, karon makita ko na Ikaw sa akong mata. Nadungog kong ginasulti ni Jesus Cristo nga Iyang gisaad kana, akong makita karon nga buhi kana nga saad.” Kita n’yo? “Nakadungog ako mahitungod Kanimo pinaagi sa akong igdulongog, karon makita ko Siya sa akong mata.” Pila man ang nagatoo Niana nga mao Siya? (O Dios!)

224 Karon, samtang nga ania kita dinhi . . . nagkagabii na gayud. Ugma sa gabii magkaaduna kita og usa ka dakung panerbisyo sa pagpang-ayo. Ginapaabot nato si Igsoong Moore ug ako nga motindog dinhi ug mangampo alang sa matag tawo nga gustong makalinya sa maong linya. Apan nahunahunaan ko nga sa paghisgot niini karong gabhiona, mohimo lang ako og usa ka pagpanawag ngadto sa altar. Apan dayon nahunahunaan kong,

“dili,” nag-ingon Kini dinha, “Nakadungog ako mahitungod Kanimo pinaagi og igdulongog, karon gusto kong makita Ikaw sa akong mata.” Karon ania Siya dinhi. Nagatoo ba kamo niana?

225 Karon pagapandongan nato sa atong mga kamot ang usa’g usa. Karon, hinumdumi, ang mao rang Usa nga nagsaad nga Iyang buhaton *kini*, nag-ingon, “Maganunot kini nga mga ilhanan ngadto kanila nga nagatoo.” Gisulti ba Niya Kini? Usa ka ba ka magtotoo? Moingon, “Amen.” Bueno, kung ingon-ana, ang mao ra nga Dios nga nagsaad niini nga inyong nakita Siyang nagapamuhat bag-o lang karon, . . . Pangutan-a ang si kinsa man niadto nga mga tawo, wala pa gayud ako nakakita kanila, nga wala gyu’y nahibaloan og bisan unsa man bahin kanila. Dili ako makaila kanila karon mismo, kita n’yo, imposible nga mahimo ko. Apan kinahanglan nga matuman kana nga Kasulatan! Bueno, kung natuman kana, nagapakita kini nga ania na kita sa kaulahiang mga panahon, mahibaloan nato nga ang Anak sa tawo andam na . . . nga moabot, tungod kay Iyang ginapadayag ang Iyang Kaugalingon diha sa tawhanong lawas. Husto ba kana?

226 Dayon nahibaloan nato nga matuod kini, ug ginaingon ninyo nga magtotoo kamo Kaniya, ug ginapandongan ninyo sa inyong mga kamot ang usa’g usa. Ug kung nakapandong ang inyong mga kamot diha sa usa’g usa, ang kanang mao ra nga Anak sa Dios nga ania karon sa pagpamatuod *niini* ngadto sa inyong mga mata, ang mao sa gihapon nga Anak ania karon aron ingnon nga, “Sila’y mamaayo na!” Ang mao ra nga Anak sa Dios! “Nakadungog ako nga nag-ingon Siya, ‘Kung adunay pandongan ang mga magtotoo sa ilang mga kamot, mangaayo sila.’ nadungog ko kini sa akong mga igdulongog, karon tugoti ako nga makita kini sa akong mga mata. Nagsaad Siya nga buhaton kini.”

Karon samtang nga nagaampo ako, mag-ampo kamo.

227 Ginoong Jesus, sa Ngalan sa Ginoong Dios sa Langit, tugoti nga mokanaug ang Imong Espiritu ngadto sa kasingkasing niining mga tawo; kanang tinuod nga iyaha nga pagtoo sa Dios, nga maoy magpamatuod niini nga saad ngadto kanila. Ug hinaut nga ayohon sa Dios sa Langit ang matag usa kanila, sa diha nga ginatuman nila ang Imong mga sugo pinaagi sa pagpandong og mga kamot sa usa’g usa. Tugoting maingon niana, Ginoo. Sa Ngalan ni Jesus Cristo, tugoti nga mahimong ingon niana, alang sa Imong kahimayaan.

228 Karon, nagatoo ba kamo nga naangkon na ninyo kung unsay inyong gihangyo? Aduna ba’y butang diha sa inyong kasingkasing nga nagaingon kaninyo? Mabati ba ninyo kanang diyutay’ng tipik sa pagdihog, miingon, “Aba, tapos na kini! Nahimo na”?

229 Nag-ingon ang kasugoan sa Dios nga madungog nato kini pinaagi sa atong igdulongog, karon makita nato kini pinaagi sa atong mata. Nag-ingon si Job, “Nakadungog ako mahitungod Kanimo pinaagi’g pagpaminaw sa igdulongog, apan karon makita ko Ikaw pinaagi sa akong mga mata.”

230 Karon, nadungog ninyo kini pinaagi sa Pulong, sa pagpaminaw sa Pulong, “Ang pagtoo nagaabot pinaagi sa pagpaminaw, sa pagpaminaw sa Pulong.” Karon makita ninyo Kini nga nagapamuhat, pinaagi sa inyong mga mata! Karon, kanang mao ra nga Dios nga nag-ingon niana, sa diha nga kining mga butanga magakahitabo, nga “ang mga magtotoo Niini ilang pagapandongan sa ilang mga kamot ang mga masakiton ug sila’y mangaayo.” Karon miabot na ba kini ngadto sa inyong kasingkasing nga kamo’y “naayo na”? Ipataas ang inyong mga kamot kung ingon-ana. Amen! Kana ang tinuod nga apostolikanhong pagpang-ayo. Tininuod ba kini kaninyo? Ginatoohan ba ninyo Kini sa tibuok ninyong kasingkasing? Alleluyah! Kana lang ang atong kinahanglan.

Manindog kita ug ihatag nato Kaniya ang pagdalayeg, kung ingon-ana.

231 Salamat Kanimo, Ginoong Jesus. Dalaygon ang Ngalan sa Ginoo.

I will praise Him! I will praise Him!
Praise the Lamb for sinners slain;
Give Him glory, all ye people,
For His Blood has washed away each stain.

232 Karon, ginahigugma ba ninyo Siya? Karon kitang, tanan, maghatag Kaniya og kahimayaan, tanan kamong mga tawo. Karon, tan-awa, kung nahipadayag na kana kanimo sa Dios, sa nianang alagianan nga naluwas ka, sa mao rang alagianan nga nag-ingon kanimo nga “ikaw naluwas,” sa mao rang alagianan nga gilihokan sa Dios, sama sa Iyang gibuhad pinaagi kang Job ug sa mga propeta, nanglihok Siya pinaagi kanimo pinaagi nianang alagianan ingon nga usa ka Cristohanon, pinaagi sa Iyang Langitnong pagpadayag nga “ikaw giayo na,” nan wala na’y bisan unsa pa man nga makapugong niini sa pagkahitabo.

So we give Him glory, all ye people,
For His blood has washed away each...
(Matag pagduhaduha; nabanwas na ang tanang pagduhaduha.)

I will praise Him! I will praise Him!
Praise the Lamb for sinner slain;
Give Him glory, all ye people,
For His blood has washed away each stain.

233 Oh, dili ba ninyo Siya ginahigugma? Ah, pagkahibulongan. “Nakadungog ako mahitungod Kanimo, Ginoo, sa akong igdulongog, ug ang pagtoo nagaabot pinaagi sa pagpaminaw;

apan karon makita ko Ikaw, ang Dios nga nagapadayag sa Iyang Kaugalingon sa taliwala sa Iyang katawhan sama sa Iyang gibuhat kang Abraham, pinaagi sa Iyang saad dinhi nga igapadayag sa Anak sa tawo ang Iyang Kaugalingon sa mga adlaw nga ang kalibutan napaingon na sa Sodomanhong kahimtang.”

²³⁴ Ug adunay mitungha nga tulo ka mga mensahero, nga mikanaug gikan sa Langit.

²³⁵ Ug adunay usa ka grupo sa denominasyon didto sa Sodoma, ug adunay miadto didto nga usa ka Billy Graham ug usa ka Oral Roberts. Ug timan-i sama sa gikaingon ko na kaninyo, walay ni asa man sa kasaysayan sa iglesia nga nagkaaduna gayud og usa ka mensahero nga gisugo sa tibuok kalibutan ngadto sa iglesia, gawas lang sa karon, nga ang iyang ngalan nagahinapus sama sa kang Abraham, h-a-m. G-r-a-h-a-m, unom ka letra, ngadto sa kalibutan, nga numero sa tawo.

²³⁶ Apan ang Abraham adunay pito ka letra diha sa maong ngalan, ang kumpleto ug hingpit nga numero sa Dios. Kita n'yo?

²³⁷ Ug himatikdi kung unsay gipanghimo sa maong mga mensahero nga miadto didto: nagwali sa Pulong, nagtawag kanila pagawas, nag-ingon kanila nga maghinulsol.

²³⁸ Apan ang Usa nga mipabilin didto kang Abraham, kita n'yo, nagbuhat og usa ka milagro pinaagi sa pagsulti kang Abraham kung unsay ginabuhat ug ginahunahuna ni Sarah didto sa balongbalong nga atua sa Iyang likod. Ug si Jesus, nga ang Maong atua niining persona, miingon, “Sa diha nga ang kalibutan maanaa na sa usa ka Sodomanhong kahimtang, sama kaniadto, igapadayag pag-usab ang Anak sa tawo.” Ug ginapamatud-an sa tanang uban pang mga Kasulatan nga mamaingon niana gayud. Ang... “Sa sinugdan mao na ang” [Nagaingon ang kongregasyon, “Pulong,”—Ed.] “ug ang Pulong uban sa” [“Dios,”] “ug ang Pulong maoy” [“Dios.”] “Ug ang Pulong nahimong unod ug nagpuyo ipon kanato.” Husto ba kana? Karon makita nato ang kanang mao ra nga gisaad nga Pulong, sa Lucas, sa Malaquias, tanan na niining uban pa nga mga saad alang niining adlaw, nahimong unod, nga nagapuyo ipon kanato, nga nadungog nato pinaagi sa atong mga igdulongog; karon ato Siyang makita (pinaagi sa atong mga mata) nga nagahubad sa Kaugalingon Niyang Pulong, dili nato kinahanglan ang unsa man nga hubad sa tawo. O iglesia sa buhing Dios, dinhi ug diha sa mga telepono, magmata na kamo sa dinalian, sa dili pa kini ulahi na kaayo! Panalanginan kamo sa Dios.

I love Him, I love Him
Because He first loved me,
And purchased my salvation
On Calvary tree.

²³⁹ Mahunahuna ba ninyo, iglesia, nga inyong ginalantaw sa kaugalingon ninyong mga mata... Ang nadayag nga buhi nga Pulong sa Dios, ang saad sa maong takna, sa kaulahiang mga adlaw, nagalantaw ang kaugalingon ninyong mga mata sa buhi nga Pulong ingon nga nahubad diha sa natural nga porma, ang Dios nga ania sa atong taliwala! “Makita ko Siya sa kaugalingon kong mga mata, ang Usa... Nadungog ko nga Iya kining buhaton.” Ang tanang manggialamon kaniadto nanagpaabot alang niining adlaw, karon makita nato Kining nahipadayag sa kaugalingon natong mata. Kung unsa kadaghan sa maong mga nanagsinggit nga mga Methodist, mga Baptist, ug ang tinuod, lunsay’ng mga pentecostal sa ilang kapanahonan, ang nangandoy nga makitang nagakahitabo kini! Daghan kanila ang nasayod niadto nga mahitabo kini. Apan nagabarug kita karong gabii sa pagkakita nga nagakahitabo kini! Oh! Dili ba ninyo Siya ginahigugma?

²⁴⁰ Karon, nag-ingon si Jesus, “Tungod niini ang tanan makaila nga kamo Akong mga tinun-an, kung kamo maghigugmaay ang usa ug usa.” Busa ingon nga ginahigugma nato Siya, maglamanohay kita ug kantahon ang *I Will Praise Him! I Will Praise Him!* Sige.

I will praise Him! I will praise Him!
 O praise the Lamb for sinners slain;
 Give Him glory, all... (Kumusta ka na?)...
 people
 For His Blood has washed away each stain.

²⁴¹ Unsa ba’y giingon sa reyna ni Belsasar sa atubangan sa iyang hari niadtong gabhiona? “Adunay usa ka tawo sa imong gingharian nga maoy usa ka magwawagtang sa mga pagduhaduha.” Ug ang Espiritu Santo, karong gabhiona, mao ang magwawagtang sa mga pagduhaduha! Nagatoo ba kamo niana? [Nagapakigsulti si Igsoong Branham sa usa ka tawo—Ed.] Ang magwawagtang sa mga pagduhaduha! Karon, ang Dugo ni Cristo mao ang nagawagtang sa matag mansa, ang mansa sa mga pagduhaduha. Wala na’y mas grabe pa nga kasalanan sa kalibutan kay sa ang dili-pagtoo, “Kay ang wala nagatoo, nahinukman na sa silot!” Husto ba kana? “Ang wala nagatoo nahinukman na.” Adunay usa lang ka sala, ug kana mao ang dili-pagtoo. Ang pagpanigarilyo dili usa ka sala, ang pagpamalikas dili usa ka sala, ang pagpanapaw dili usa ka sala, ang pagpamakak dili usa ka sala; dili kana sala, mao kana ang mga resulta sa dili-pagtoo. Ang dili-pagtoo! Ginabuhat mo kini tungod kay wala ka mitoo. Kung nagatoo ka Niini, wala mo kini ginapamuhat.

²⁴² Oh! Oh! Daw sa unsa ka... Pagkamaanindot! Ug ang Dugo sa Cordero ang maoy nagwagtang sa tanang pagduhaduha. Ginatoohan nato ang Iyang Pulong, sa bug-os nga kusog. Nagatoo kita nga ang Pulong nahimong unod. Ug nagatoo

kita nga ang Pulong *gayud* nahimong unod pinaagi sa kapanghimatuoran sa Iyang Presensiya karon aron nga pamatud-an ang Iyang Pulong. Nagatoo ba kamo Niini? Panalanginan kamo sa Dios.

²⁴³ Among ginalauman nga makita kamo dinhi sa buntag, alang sa usa ka dakung panahon sa Ginoo. Iduko ang inyong mga ulo karon, ug ako nang igahatag ang panerbisyo kang Igsoong Lindsay.



AKONG NADUNOG APAN KARON AKONG NAKITA CEB65-1127E
(I Have Heard But Now I See)

Kining Mensahe ni Igsoong William Marrion Branham, una giwali sa Ingles niadtong Sabado sa gabii, Nobyembre 27, 1965, didto sa Life Tabernacle sa Shreveport, Louisiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2012 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org